




SCB H81



TROIS SERMONS

SVR LES PAROLES DE

LEVANGILE

DE

NOSTRE SEIGNEVR

IESVS-CHRIST,

SELON S. IEAN.

Chap. 12. v.31. & 32.

Par ISAAC GVITTON; Fidele Ministre du S. Euangile.



Chez ISAAC DESBORDES, Imprimeur & Libraire. 1655.

EFORTE AND SECOND TO SECON

MATERIAL SECONDARY OF THE

PLICAL BERNARD COM

Letter of Married

भूभूतिक स्थापन स्यापन स्थापन स्यापन स्थापन स्थापन

A

MADAME:

MADAME,

LA MAR QVISE

DE LA

ROCHEGIFFARD:



ADAME,

Ie vous donne les Sermons que vous m'auez demandez, ie n'eusse iamais

a 2

EPISTRE.

pense à les laisser aller sous la presse, si auois peu y reculer dauantage sans manquer à ce que ie vous dois. Ie crains de me produire dans un siecle si illuminé que le nostre, auec si peu de lumiere, of de mester des Sermons faits à la haste, parmy mes distractions ordinaires, pour estre ouis, non pour estre leus; auec ceux qui vous viennent tous les iours des premieres lumieres de nostr**e** temps.Vostre pieté, MADAME, vous fait cherir la verité iusques dans la bouche des enfans. La parole de Dieu est vne manne que vous goustés auec toute sa douceur, A qui ne vous ennuye iamais. V ous y aués trouué vostre consolation au temps de vostre détresse, elle vous a soustenu dans vos plus rudes épreuues, vous prennés plaisir en ses lu-

EPISTRE.

micres, & vous y laissés conduire, l'efficace que Diea luy donne cn vostre Esprit par sa grace, la vous fait considerer comme vostre unique tresor. C'est, MADAME, ce qui me fait esperer que sans comparer ce que ie vous presente, auec ce que vous deuez plus estimer; vous vserés de ce mien petit talent, que le Seigneur m'a départy, auec edification. Ie reconnoistrois tresmal les graces que l'ay receuës de vostre Illustre Maison, si ie ne tesmoignois icy la part que ie prens aux preuues que Dieu luy donne de sa faueur. Souuent les larmes se sont meslées parmy ses ioyes, of des coups autant rudes qu'impreueus, ont abbattu plus d'une fois ses plus illustres ornemens iusqu'en terre: Mais Dieu, MADAME,

EPISTRE

a tous-jours esté son support, auec sa grace, tout luy a reussi en bien ce qui sembloit le plus perdu pour elle, est ce qui l'a tous-jours esté le moins; voyant les Peres renaistre dans leurs Fils, leur Vertu, leur cstime auec les autres qui y estoient attachées, se prouigner auec leur posterité. l'ose dire, MADAME, que c'est vostre principale consolation dans la perte que vous auez faite. Monsicur le Marquis vostre Fils, suit feu Monsieur son Perc de si prés, of auce tant de conformité, que cette grande estime du Pere, que la mort n'a peu esteindre dans l'esprit de tous ceux qui l'ont connu, a trouué dans la vertu du Fils H és graces qui l'accompagnent, où se reprendre aisement, auec autant de gloire que iamais.

EPISTRE.

Dieu vucille, MADAME, le vous conseruer longuement en sa grace, fortissier vostre santé dans les soins assidus que vous prennés pour l'agrandissement de sa maison, benir ceux qui le suiuent et que vous aimés auec luy, et faire seruir le tout à sa gloire, à vostre salut, à l'édissication de son peuple. Ce sont les souhaits de celuy qui auec tout respect, se dit,

MADAME,

Vôtre Tres-humble & tres-Obeissant Seruiteur.

GVITTON.

Au petit Breil ce 14. Iuillet 1655. 11 8 18 18

10-11-5

> o deri daga San Mel

TROIS SERMONS SVR CES PAROLES DE L'EVANGILE

IESVS-CHRIST.
SELON S. IEAN.

Chap. 12. v. 31. 32.

31. Maintenant est le Iugement de ce Monde, maintenant le Prince de ce Monde sera ietté dehors:

32. Et moy si ie suis enleué de la Terre ie tireray tous hommes à moy.

TRES-CHERS FRERES,

A Foy que nous auons en nostre Seigneur Iesus, ne peut estre bien asseurée, qu'elle ne soit appuyée dessus ce fondement; à sçauoir, que men ne

2 Premier Sermon sur ces Paroles se peut imaginer de si grand, de si admirable & de si diuin, soit és qualités de l'esprit, soit en l'autorité & dignité des personnes, que cela ne se trouue en N. S. lesus en toute perfection. Cette verité se recueille de ces passages de l'Escriture qui nous apprennent qu'il est le Fils de Dieu, sa Parole, son Image, la resplendeur de sa Gloire, la marque engrauée de sa personne, le premier né de toute creature par lequel toutes choses ont esté faites, & qui les soustiét toutes par sa parole puissantc. Le bon plaisir du Pere, dit S. Paul, a Colos. esté que toute plenitude habitast en luy, à sçauoir toute plenitude de deité, qui depuis que la parole a esté faite chair habite en luy corporellement. Cette Foy encore qu'elle soit appuyée dessus vn fondement si glorieux & si solide, ne nous peut apporter aucune consolation qu'elle ne se represente que tout ce qu'il y a de grand & d'accomply en N. S. Iesus nous regarde, depuis que ce Fils nous a esté donné, & s'est fait

de S. Iean chap. 12. v. 31. 32. 3 nostre frere, en reuestant nostre chair, pour estre le tout employé dans l'œuure de nostre redemption. Celuy qui nous a donné son Fils, nous Rom.8 a ausi donné toutes choses auec luy, afin que toutes choses soient à nous com- 1. Cor. me nous sommes à Christ, & comme Christ est à Dieu. En luy nous auons Ephes, esté benits en toutes benedictions spirituelles és lieux celestes. Il a esté fait 1. Cor. pour nous Sapience, Iustice, Sanctifica-i. lation que nous receuons du raport que nous faisons à nous mesmes des choses toutes diuines qui sont en Iesus - Christ, ne peut estre plus grande, que lors que la Foy, qui contemple la gloire de nostre Redempteur, en considere par le menu tous les vsages, pour les appliquer à chaque partie de nostre besoin, selon le but que la sapience diuine leur a ordonné, trouuans dans le sang de Christ nostre Iustice, dans son Esprit nostre Sactification, dans le Ciel, où il est entré comme auantcoureur pour nous, nostre heritage,

Premier Sermon sur ces Paroles Et recueillans encore de chacune de ces graces à part, toutes les vtilités qu'elles peuuent auoir en toutes les parties de la vie du fidele, pour la rendre accomplie & parfaite en toute bonne œuure. Tous ne comprenent pas ce qu'il y a de glorieux en Iesus Chr. Tous ne se l'appliquent pas en le comprenant, & entre ceux qui se l'appliquent en general, tous ne sont pas capables d'en recueillir pour eux mesmes les vsages particuliers que Dieu nous y presente. De là est venu le besoin que nous auons du ministere de la Parole de Dieu, qui en la nous expliquant la nous applique, & en la nous appliquant nous en fait voir par le menu toutes les instructions que nous en receuons. C'est ce que le Seigneur Iesus pratique és Paroles qui viennent d'estre leuës deuant vous, à l'occasion de cette voix qui luy fut enuoyée du Ciel, de la part de son Pere, touchant son Nom: Et ie l'ay glorifié, & derechef ie le glorifieray. Les assistans ouyrent cette voix,

Vers.

de S. Iean chap. 12 y. 31. 32. mais ne pensans à rien moins qu'à regarder s'il y auoit en cet Oracle quelque chose qui les concernait; Le Seigneur prend la parole & leur dit : Cette voix n'est point venue pour vers. moy mais pour vous; Leur represen-30. tant qu'il s'agissoit en cette glorisication du Nom de Dieu, que cet oracle leur promettoit, d'vn mysteretres important à leur salut. Et pour ce que d'eux mesmes ils estoient incapables de le descouurir s'il le leur explique en disant; Maintenant est le Iugement de ce monde, maintenant le Prince de ce monde sera ietté dehors, & moy si ie suis enleué de la terre ie tireray tous hommes à moy. Leur representant qu'en suitte de cette glorification, le monde receuroit de la part de Dieu vn iugement notable & fauorable pour eux, Satan seroit ietté dehors pour leur deliurance, & que ce qui semble. roit deuoir plus esloigner les hommes de sa communion, à sçauoir sa croix, seroit ce qui attireroit tous hommes à luy,

En l'action precedente, nous vous dismes qu'en cette voix du Ciel, Ie l'ay glorifié &c. il s'agissoit de la glorification du Nom du Pere en laquelle le Fils deuoit aussi trouuer la sienne, & qui deuoit mettre en euidence ce qu'il y a de plus glorieux en Dieu, sa Iustice, sa Misericorde, sa Sapience, sa Charité, sa Fidelité en ses promesses & autres telles vertus dignes du nom de Dieu & dont la consideration apportoit vne singuliere consolation au Seigneur Iesus à l'abord de ses souffrances, & dans le trouble que son Ame commençoit à en ressentir. C'est donc cette glorification que nous auons maintenant à confiderer auec l'assistance de Dieu, en trois égards. Premierement au regard du monde qui y trouue son Iugement. Secondement au regard du Diable qui se trouue chassé dehors & Finalement au regard de Iesus-Christ, de qui la mort deuoit attirer tous hommes à luy.

Et pource qui est du premier de

de S. Iean chap. 12. y. 31. 32. ces points. La premiere chose qu'on y doit considerer est ce monde, dont parle le Seigneur. Ce terme dans fon premier vlage signifie l'Univers, c'est à dire cer assemblage admirable des Cieux & de la Terre & de toutes les creatures qui le composent. A cet Vniuers les Grecs ont donné le Nom de monde à cause de sa beauté; ayant remarqué en ce grand Tout les carracteres que Dieu y a imprimés tant de sa puissance eter- Rom. 1 nelle que de sa Dininité qui luy sont vn ornement tout divin & vne riche lumiere aimable d'elle mesme & capable d'illuminer tout homme qui Ican, 1 vient au monde, & si on s'en seruoir comme il faut de le rendre sage à salut. La plus importante piece de cet Vniuers est l'homme qui en est l'abregé : c'est pour luy qu'il a esté premierement basti: il en a esté fait le Chef, portant en cela l'image de son Createur entre toutes ses œuures; estant au dessus de toutes comme Dieu est au dessus de luy : à cause de cela le Nom du tout a esté

A 4

8 Premier Sermon sur ces Paroles donné à sa plus noble partie, & le genre humain a esté appelé le monde, le reste de l'Vniuers n'estant consideré qu'à cause des hommes & dependant de leur estat & constitution, les exemples en sont frequens és escrits des Euangelistes & des Apostres. Allez, disoit le Seigneur à ses Apostres par tout le monde o preschez l'Euangile à toute creature, qui croira & sera baptisé sera sauné. lean ; Dieu a tant aimé le monde (dit le mefme Sauveur) qu'il a donné son Fils vnique afin que quiconque croit en luy Rom. 4 ne perisse point mais ait la vie eternelle. Ainsi Abraham a esté fait heritier du monde, par cette promesse, En

Genel ta semente seront benites toutes les fa-¥2.

milles de la terre.

Marc

S'il n'y auoit iamais eu qu'vn Adam, il n'y auroit iamais eu qu'vn monde; mais outre le premier Adam qui a esté tiré de la terre, Dieu en ayant suscité du Ciel vn second, à sçauoir le Seigneur? il faut qu'il y ait deux mondes, comme il y a deux Adams, l'vn qui depende du pre-

de S. Iean chap. 12. 4.31. 32. mier & en porte l'image, l'autre qui depende du second, & luy soit pareillement conforme. Selon cela il'y a vn monde que l'Escriture appelle ce monde ou ce present sucle, & Gal. 1. vn autre qu'elle appelle le monde à Heb. venir la nouvelle creature, les nouveaux Gal s. Cieux & la nouvelle Terre que nous attendons. Si ces deux Adams auec leurs mondes auoient esté suscitez de Dieu en mesme temps, l'vn de la terre & l'autre du Ciel, pour n'auoir iamais rien de commun ensemble; Le second ne presupposeroit point necessairement le premier, ou s'il y auoit quelque ordre au regard de leur existence, il n'y en auroit point au regard de leur dependace: mais le second Adam ayant reuestu la chair du premier, & tirant son monde nouueau des ruïnes de l'Ancien; non seulement il y a deux mondes comme il y a deux Adams, mais deplus il faut que là où ces deux mondes sont opposez celuy qui est appelé ce present monde, soit celuy qui descend du premier Adam

No Premier Sermon sur ces Paroles & en porte l'Image, & à l'opposite que le monde à venir soit cesuy du second Adam, à sçauoir du Seigneur qui est descendu du Ciel.

Et de là vous pouuez iuger ce qu'on doit croire de ce present monde. Car suiuant la condition du premier Adam qui en est le Chef, non seulement ce doit estre vn monde tout terrestre en tout ce qui le concerne puis que l'Adam dont il fort a esté tiré de la terre, mais il faut que ce soit vn monde tout corrompu en ses imaginations, en ses pensées, en ses volontés, en ses inclinations & connoitifes, vn monde esclaue de la mort & de la malediation diuine, puisque le premier homme de ce monde dont naissent tous les autres, est descheu de la pureté de sa creation par sa desobeisfance, est tombé és tenebres du peché & de la mort qui en est le gage. Voila pourquoy l'Escriture ne parle iamais de ce monde qu'en mauuaise part comme d'yne chose ennemie de Dieu, dont la corruption est à

de S. Iean chap. 12. V. 31. 32. 11 derester & la malediction à craindre. L'amitié du monde, dit S. lacques, Taeq. 4 est inimitié contre Dieu, qui voudra estre amy du mode sera ennemy de Dieu. 3. Pier. Fuyés, dit S. Pierre, la corruption qui est en la conuoitise du monde. N'aimez point le monde, dit S. Iean, ny les 1. Iean choses qui sont au monde, si quelqu'un :. aime le monde l'amour du Pere n'est point en luy. Et ce monde passe & sa convoitise, mais celuy qui fait la volonté de Dieu demeure eternellement. Iugez à l'opposite quel peut estre le monde nouueau, que nous attendons, puis que tirant son estre & sa subsistance d'vn Adam tout Divin, tout Celeste, tout Sainct, tout Incorruptible, tout Victorieux de la mort', tout rayonnant en gloire; il faut qu'il en porte l'image en sain-Acté, en justice, en lumiere, en incortuption & immortalité. Ce n'est pas, tres-chers Freres, du monde à venir, où tout est lumiere, vie & benediction de par Dieu, qu'il s'agist en nostre texte; mais de ce monde terrestre & charnel, tenebreux &

horrible pour l'iniquité qui y regne, & la malediction qui luy est prepaparée, s'il ne la preuient par repentance.

La seconde chose qui est à remarquer au premier point de nostre texte, est ce que le Seigneur a entendu par le iugement de ce monde dont il parle. Sans doute il n'a pas entendu vn iugement procedant de ce monde & de son esprit au regard de la gloire du Pere qui devoitestre reuelée en luy. Car cette gloire est vne chose à laquelle ce monde de foy ne pense point, c'est ce qu'il ne peut comprendre quand il y pense, & le iugement qu'il en fait, en s'y arrestant, est qu'il estime folie ce qui est la sapience de Dieu. Icy le Seigneur Iesus ne se soumet pas auec la gloire du Pere qui se reuele en luy, au iugement de ce monde; mais plustost il soumet le monde à son iugement : il s'agist donc icy d'vn iugement procedant de Dieu juste luge au regard de ce monde qui en doit estre jugé. Ce terme

de S. Iean chap. 12. \$. 31. 32. 13 de Iugement, quand il est attribué à Dieu au regard des hommes, est d'vne vaste estenduë. Es liures do Moyse & des Pseaumes, il est souuent pris pour les Loix & les Ordonances que Dieu a establies pour ps. 1192 la conduite des hommes. Ie te celebreray, dit Dauid, d'un cœur droit quad i auray appris tes iustes iugemens. Au cinquiéme de cet Euangile le Seigneur le prend pour le gouuernement du monde que le Pere luy a mis en main, quand il dit, le Pere ne juge plus personne mais a donné tout jugement au Fils, afin que tous honorent le Fils comme tous honorent le Pere, qui n'honore point le Fils n'honore point le Pere qui l'a enuoyé. Ailleurs ce terme de Iugement represente les voyes que Dieu suit en l'administration de l'empire du monde, & les merueilles qu'il y execute, c'est ainsi que le prend Dauid au Ps. 36. quand il dit, O Dieu ta justice est comme vne haute montagne, tes jugemens comme une grande abisme, tu sauues hommes & bestes. D'où vient cette

14 Premier Sermon sur ces Paroles exclamation de l'Apostre sur le mesme sujet, o profondeur des richesses de la sapience & de la connoissance de Dieu! que ses iugemens sont incomprehensibles & ses voyes imposibles à trouver! c'est ainsi que Dieu au 6. de l'Exode appele les merueilles que Dieu deuoit executer en Egypte pour la deliurance de son peuple de grands jugemens, Ie vous retireray, dit · il, de dessous les fardeaux d'Egypte & vous deliureray de leur seruitude, & vous en garentirày auec bras estendu & grands jugemens. Bref, ce terme de jugement de Dieu est pris pour celuy de vengeance, de punition & de chastiment, comme en ces paroles de S. Pierre, Il est desormais temps 1. Pier. que le iugement de Dieu commence par sa maison, & s'il commence premierement par nous quelle sera la fin de ceux qui sont rebelles à l'Euangile de

Rom.

Dieu. De là vient que le sujet qui oblige Dieu à respandre ses vengeances sur les hommes, est appelé du nom de lugement. C'est icy le

lean 3 jugement, dit le Seigneur, la lumiere

de S. Iean chap. 12. y: 31. 32. est venue au monde, mais les hommes ont mieux aimé les tenebres que la lumiere, d'autant que leurs œuures sont meschantes. Et pour la mesme raison le iour de l'ire est appelé par l'Apostre, le iour de la declaration du Romez iuste ingement de Dieu, & le iour du jugement. Telle estant l'estenduë de la signification de ce terme és sain-& Es Escritures; Les Interpretes tant anciens que modernes, se sont trouuez en peine comment le prendre au passage que nous exposons. Il est certain qu'il s'y agit d'vn jugement dependant de la reuelation de la gloire du Pere en la face de Iesus-Christ: car c'est en suitte de cette voix, Ie l'ay glorisié, & derechef ie le glorifieray, & en y regardant que le Seigneur a dit, maintenant est le iugement de ce monde. Aussi est il certain que le Seigneur ne regarde pas icy precisément aux dernieres vengeances qu'il prendra de ses aduersaires en son apparition, car l'heure de ce jugement terrible alors n'estoit point encore venuë:

16 Premier Sermon sur ces Paroles Aussi ne parle t'il pas des loix de Dieu & de l'autorité de regner que le Pere luy a donnée, mais des merueilles qu'il auoit a executer, tant en l'establissement de son Empire au monde, qu'en son administration iusqu'à la fin. Or en cette administration de l'Empire de Christ, peut on considerer trois choses, à sçauoir, Premierement le changement grand & merueilleux en toutes choses qu'elle a apporté au monde, que les Prophetes auoient representé par vne creation de nouueaux cieux & d'vne nouuelle terre, où toute memoire des choses precedentes seroit abolie. Ce qui faisoit dire à l'Apostre, Les choses vicilles sont 2. Cor. passées, voicy toutes choses sont faites nounelles. Outre ce changement on cosidere en l'administration de l'empire de Christ le partage qui s'y de-

uoit faire des hommes à l'ouye d'vne mesme parole, les vns la suiuans & les autres la reiettans. Apres ce partage fait il y a dans la conduite de l'Empire de Christ, à considerer

5.

de S. Iean chap. 12. v. 31. 32. 17 la manifestation de la condamnation du monde & sa justice qui ne pouvoir estre mise en plus grande euidence que par la resplendeur de la gloire de Dieu en Iesus Christ.

Selon cela il y en a qui rapportent ce iugement du monde au sujet de sa condamnation, comme si le Seigneur disoit, maintenant on sçaura que c'est iustement que le monde est condamné quand sa malice, son incredulité & rebellion contre Dieu, seront mises en euidence par la gloire que Dieu doit reueler en moy. D'autres rapportent ce jugement du monde à la separation qui s'y fait des bons & des meschans: comme s'il disoit, maintenant il sera aisé de juger des hommes & de discerner entre ceux qui sont de Dieu & ceux qui sont du monde, quand on verra les vns illuminés de la gloire de Dieu en la face de son Christ, & les autres per-seuerer en leur aueuglement. Mais quoy qu'il n'y ait rien en ces interpretations, qui ne se puisse adap-

18 Premier Sermon sur ces Paroles ter aux paroles du Seigneur Iesus. Il est plus conuenable de rapporter ce iugement du monde au changement merueilleux que la reuelation de la gloire de Dieu en Iesus-Chr. y deuoit apporter changement qui est tout à l'auantage du monde, & à la confusion du Diable qui s'en estoit emparé. Car comme le Seineur en disant aux assistans, cette voix n'est point venue pour moy, mais pour vous, par ces termes, pour vous, a voulu designer qu'elle leur estoit fauorable, & concernoit choses importantes à leur salut; aussi quand en expliquant comment cette voix estoit pour eux, il adjouste, maintenant est le jugement de ce monde, ç'a esté pour expliquer ce que cette, voix du Ciel auoit de fauorable. pour les hommes, à scauoir, vn restablissement heureux de toutes choses en ce monde, qui dessous son gouvernement avoit à prendre vne nouuelle face conformement à cette prediction d'Esaye. Voicy mon Seruiteur que i'ay esteu, mon bien-aime

Elaye

de S. Iean chap. 12. §. 31. 32. 19 auquel i'ay pris mon bon plaisir, ie mettray mon Esprit sur luy & annoncera iugement aux nations, il n'estriuera point & ne criera point, on n'orra point sa voix es rues, il ne brisera point le roseau casse & n'esteimdra point le lumignon qui fume, iusqu'à ce qu'il face sortir le iugement en victoire, c'est à dire iusqu'à ce que sa sage & iuste conduite ait triomphé de toutes les confusions du monde.

En effect, tres-chers Freres, le changement que le regne de Christ. a apporté au monde est merueilleux. Car si vous auez égard à ce que peuuent estre sans luy les cosciences des hommes; y a t'il rien de plus. admirable & de plus salutaire, tout ensemble que ce changement qui rend lumiere au Seigneur, ceux qui n'estoient que tenebres auparauant, met la paix de Dieu, où estoit la crainte de son ire; & le regne de iustice où estoit la tyrannie du peché & l'esperance de la joye où tout estoit remply des frayeurs de la mort. Si vous considerez le regne

20 Premier Sermon sur ces Paroles de Christ eu égard à la dispensation des secrets du Ciel, y a t'il rien de plus glorieux & de plus auantageux tout ensemble, que ce ministere de la nouvelle alliance, qui remplit de ses verités eternelles toutes les predictions de l'anciene iusqu'à vn iôta, fournit le corps & la viue image des biens à venir, dont on n'auoit que les ombres sous la loy, reuele aux principautez & puissances celestes la sapience de Dieu merueilleuse en toute maniere, qu'en vain ces esprits bien heureux s'efforçoient de descouurir au fond d'vn propitiatoire charnel. Si vous considerés le regne de Christauregard de son estenduë, sçauroit on s'imaginer vn changement plus inesperé & plus important au monde que celuy qui a rompu la paroy entremoyenne qui tenoit l'Israël de Dieu renferme comme dans vne prison dans la semence charnelle d'Abraham, a fait voir le salut de Dieu à toutes nations, a r'allié en vn corps ceux que l'inimitié diuisoit & a donné vn accom-

de S. Iean chap. 12. y. 31. 32. 21 plissement admirable à cette celebre prophetie du dernier des Prophetes, depuis le Soleil leuant iusqu'au couchant Malach mon Nom sera grand entre les nations, 1. & par tout on offrira encensement à mon Nom & vne oblation pure, dit le Seigneur des armées. Bref si vous considerés la fureur des peuples d'autresfois apres les dieux estranges, le credit enuieilly & obstiné de leurs superstitions; qui eust creu qu'au Nom de Christ, tant d'idoles dont toute la terre estoit remplie, eussent deu tomber à terre par tout pour n'estre iamais releuées; que tant d'Oracles de mensonge, qui abusoient & tirannisoient les pauures mortels, au premier son de l'Euangile de Christ, eussent deu se taire tout d'vn coup; que tant d'abominations dont tout le monde estoit inondé eussent deu quitter la place aux loix tres-sainctes du Redempreur d'Israël! grand donc & admirable est le iugement de ce monde, qui en cette maniere a changé la face de ce monde, & l'appelle à vne

B 3

22 Premier Sermon sur ces Paroles celeste perfection, où rien ne luy restera de sa condition precedente, qui le rendoit horrible & digne de toute malediction.

La derniere chose en fin qu'on peut considerer au premier point de nostre texte, est le rapport qu'à le iugement de ce monde qui s'employe pour sa restauration, auec la glorification du Nom du Pere, promise par cer Oracle, Ie l'ay glorisie, Giele glorifieray. Car de la on peut recueillir, ou que la glorification du Nom du Percest vne suitte du iugement de ce monde, ou que le iugement de ce monde est vne suitte de la gloire que le Pere a reuelée en son Fils bien-aimé : l'vn & l'autre reuient à vn; car la gloire que Dieu reçoit de l'obeyssance de son Fils, produit la restauration du monde, qui doit elle mesme apporter au Nom de Dieu vne seconde gloire, qui iointe à la premiere la fait éclater au double & la rend parfaite. Ce monde ne pounoit changer de condition & passer des tenebres à

de S. Iean chap. 12. V. 31.32. 23 la lumiere, de l'iniquite à la justice, de la seruitude à la liberté, de la mort à la vie; que le Pere n'y mist la main; car il estoit trop perdu pour se pouvoir sauver de soy mesme; les moyens de sa restauration estant au dessus de toutes ses forces; Il n'auoit rien à offrir pour l'expia-200.2 tion de ces crimes; il estoit mort en ses fautes & pechez, aussi impuissant de se defaire des chaines du peché, que de briser les portes du sepulcre pour s'en retirer: mais où Dieu pardonne, il n'y a plus de crime, où Dieu iustifie, il n'y a plus de condamnation, où Dieu agit auec efficace selon le bon plaisir de sa volonté, il n'y a plus de desobeyssance & de rebellion; il est la vie, où il se communique il n'y a point de mort qui ne soit engloutie en victoire. Dieu donc venant à glorisser son saince Nom par lemploy tres-sage, tres-riche & tres-puissant de ses misericordes eternelles, il faut que ce monde en soit changé en mieux & en soit restauré. Hors de Christ,

24 Premier Sermon sur ces Paroles Dieu ne se peut glorifier à l'endroit de ce monde corrompu, qu'en le perdant : car hors de Christ il n'y a point de misericorde en Dieu pour les hommes, mais une attente terrible de jugement, & vne ferueur de feu Heb. qui consomme ses aducrsaires. C'est 2. Cor. en Christ seul que Dieu reconcilie le monde à soy, ne leur imputant point Ican I. leurs offences, pource qu'il est le seul Agneau de Dieu qui ofte le peché du monde. Il faloit donc pour procurer à ce monde vn jugement fauorable & salutaire que le Pere se glorifiast en son Fils, cerchant en luy la reparation complete de l'honeur de ses loix, que ce monde auoit mesprisées, & la porte de grace par laquelle il peut sans se faire aucun tort repandre dessus nous toutes ses benedictios & nous recueillir à luy. Ce Christ donc estant tout prest de contribuer son precieux sang pour la gloire de son Pere, le Pere répondant des Cieux qu'il agrée l'obeif-fance de son Fils pour se glorisser par elle, c'est auec tres-iuste raison

IO.

5.

de S. Iean chap. 12. \$\foralle{v}\$. 31.32. 25
que le Seigneur disoit aux luifs,
cette voix n'est point pour moy mais
pour vous, & qu'il s'en promet pour
ce monde vn jugement fauorable.

Le Seigneur Iesus s'exprime icy en termes de present, en disant, maintenant est le iugement de ce mon1. Cor. de, pource que l'heure de sa mort 15. estoit arriuée, de laquelle deuoit en éclore ces nouueaux Cieux & cette nouuelle Terre où justice habite. Ce grand œuure n'aura sa perfection complette que dans la resurrection des justes, où toutes choses reunies à Dieu par l'abolition totale de tout ce qui luy est contraire, il sera tout en tous. Mais le Seigneur tient pour tout fait & accomply, ce que Dieu alloit commencer par sa mort, pource que la perfection en estoit infallible, & que la suitte du temps que nous y remarquons, quoy que longue à nostre égard, n'est qu'vn instant aux yeux de Dieu qui a toutes choses presentes en son eternité; c'est sur ce sujet que sainct Pierre aduertit les fideles qu'vn iour

26 Premier Sermon sur ces Paroles

2. Pier. est enuers le Seigneur comme mille ans, & mille ans sont comme un iour, & qu'il n'y a point de retardement en sa promesse. La lumiere au leuer du Soleil remplit tous les airs dans vn instant, pource qu'il n'y a rien dans l'air qui y resiste, mais il n'en est pas de mesme du restablissement du monde; il n'a pas esté changé dés le premier moment que le Soleil dejustice y a resplendi; pource que les tenebres qui occupent ce monde consistent en incredulité procedante des affections de la chair, qui resistent de toute leur puissance au restablissement de toutes choses. Neantmoins le Seigneur tient pour tout accomply ce qui alloit se com-mencer en sa mort à cause de la certitude de la victoire que son Esprit deuoit remporter de l'esprit de ce monde. Bref le Seigneur s'exprime en termes de present d'vne chose qui auoit esté commencée dés les premiers âges du monde és cœurs des fideles; pource que ce grand œuure deuoit receuoir par sa more

de S. Iean chap. 12. \$\tilde{y}. 31. 32. 27 vn accroissement notable, mettre en euidence ce que iusqu'à lors auoit esté caché, & de là en auant faire des progrez merueilleux par toute la terre, qui seront combatus, mais non iamais vaincus ou retardez.

C'est là, tres chers - Freres, l'explication du premier point de nostre texte, où nous finirons aussi le present exercice, recueillans de ce que nous auons dit les principales instructions qui en naissent pour nostre edification. Representez vous donc en premier lieu, ce qui se doit esperer de ce monde tandis que le Seigneur n'y regne point, à sçauoir toute sorte de meschanceté, peruersité, rebellion & abomination: c'est vn arbre tout pourri dés sa racine qui ne peut produire de bon fruict, s'il n'est transplanté dans le champ du Seigneur, où il change de nature par sa grace. Ie ne parleray point maintenant des conclusions qu'on tire de ce principe contre les sentimens de ceux qui amoin-

28 Premier Sermon sur ces Paroles driffent autant qu'en eux est la peruersité de ce present monde pour y trouuer les motifs de cette grace divine, qui discerne les hommes. Vous estes, par la grace de Dieu, mieux instruits, & sçauez qu'entre la chair & l'esprit, que l'Escriture fait les deux principes opposez des actions des hommes, il n'y a point de milieu, & que comme les œuures de la chair ne peuuent proceder de l'Esprit de Dieu, de mesme les œuures de l'esprit en quelque degré de bonté qu'on les considere, ne peuuent proceder de la chair & de ses inclinations: seulement diray-je icy que puis que le tout de ce monde est toute vanité, qu'il faut que nous foyons bien aueugles quand opposans le monde à Dieu, nous aimons micux le monde que Dieu; prenons plus de plaisir en la connoitise du monde qu'en la volonté de Dieu, & nous reputons plus heureux en la vie du monde, qui n'est qu'vne hor-rible confusion, où tous s'égarent & s'entrehurtent, en suiuant aueu-

de S. Iean chap. 12. y . 31. 32. 29 glément les affections de leur chair iusqu'à ce que le sepulchre les air tous engloutis sans qu'ils s'en apperçoiuent, quand di-je nous faisons plus d'estat d'vne vie si tenebreuse que de la vie de Dieu qui n'est que lumiere, que droicture, que justice, où chacun void l'esperance qui l'appelle & le chemin qu'il faut tenir pour y paruenir. Que le monde donc ne vous trompe point par ses apparences, que la chair qui y regne ne vous seduise point par ses charmes. Sauuez-vous du milieu de cette generation tortuë & peruerse, ne communiqués point à ses œuures, fuyez ses conuoitises, mesprisez ses vanités & vous vous trouuerez sous ces nouueaux Cieux & en cette nouuelle terre, où la justice habite, où la paix de Dieu regne, où sa gloire remplit toutes choses.

Representez-vous en second lieu que ce monde nouveau où toutes choses sont rétablies dans vn estat convenable à la Majesté divine qui y veut habiter, ne se trouve qu'en

30 Premier Sermon sur ces Paroles lesus-Christ, afin que si le degoust de ce present siecle, l'horreur de ses tenebres, la frayeur des iugemens qui luy sont apprestés pour vengeance, vous font foupirer apres choses meilleures & plus conuenables à salut, vous ne les cerchiés point ailleurs qu'en la communion du Fils de Dieu, en qui est la vie eternelle que Dieu nous a donnée. A l'entrée d'vne comunion si auantageuse pour nous se trouue la croix de Christ en laquelle le monde nous est crucifié & nous au monde, qui aura horreur de cette croix & qui la fuyra n'entrera iamais au Royaume de Dieu. On ne peut passer de ce monde à l'autre sans douleur, pource qu'il faut que nostre vieil homme perisse, auant que le nouueau se restablisse en nous. On ne peut deuenir nouuelle creature sans vn grand & rude combat. Car le corps du peché qui est en nous ne consent iamais à sa destruction, mais y resiste de toute sa puissance: On ne peut obtenir la perfection qu'en

de S. Iean chap. 12. § . 31. 32. 31 deslogeant de ce corps mortel qui en est incapablé. Tenez-vous donc bien-heureux, où le monde s'estime mal-heureux, supportés les souffrances de Christ auec ioye; considerés la mort comme vostre vie, sçachans que si cette loge de terre est destruitte vous aués vne maison eternelle és Cieux qui est au dessus de toute corruption.

Representez - vous en sin, que cette restauration de toutes choses en Christ, depend de la gloire que le Pere reuele en son Fils bien aimé, asin que vous ne pensiez pas estre participans de cette restauration, que cette diuine gloire ne resplen-

disse en vous & ne vous illumine.
C'est en contemplant la gloire du Sei-2. Cor;
gneur à face descouverte, que nous sommes transformés dans vne mesme Image de gloire en gloire par l'Esprit du
Seigneur Contemplez en cette gloire iusqu'où le Pere a eu l'iniquité
en haine, puis que pour l'abolir il a
abandonné iusqu'à son vnique à son
ire; & cette pensée vous fera hair

32 Premier Sermon sur ces Paroles vostre iniquité, comme le Pere la haïe, iusqu'à renoncer à vous mesmes afin de vous en dépestrer. Contemplés en la mesme gloire iusqu'où le Pere vous a aimez dans les temps que vous n'estiez que pecheurs & ses ennemis; puis que pour vous reconcilier à soy il n'a point espargné son propre Fils, & cette pensée amolira vos cœurs, vous fera aimer comme Pere celuy que vous haissiés comme vn luge ennemy, vous donnera asseurance deuant son Thrône, où vous ne trouuiez que frayeur & desespoir, mettra en vous la mesme affection de charité qui a esté en Iefus-Christ, & auec luy vous rendra parfaits comme vostre Pere celeste est parfait. Contemplez en fin en cette gloire du Pere, auec quelle sapience il a pourueu à nostre Redemption; accordant fur vn mesme sujet la vengeance & la grace : & cette diuine Sapience vous fera comprendre en la mort de Christ, ce que le monde n'y comprend point, vous fera admirer ce que le monde

de S. Iean chap. 12 y.31. 32. monde tient pour folie vous en fera voir les progrez asseurés au trauers de toute la resistance que Satan, le Monde, & la Mort y peuuent apporter. Ainsi illuminez de la sapience de Dieu, ainsi échaussés par sa charité, ainsi ennemis de toute iniquité par la haine que Dieu luy porte. Nous pourrons dire auec verité, maintenant est le jugement de ce monde en nous, maintenant nous sommes nouuelles creatures, nous ne sommes plus du monde mais à Christ en qui Dieu nous a viuisiez ensemble, nous sauuant par sa grace, & nous a ressuscitez ensemble, & fait asseoir ensemble és lieux Celestes, en gloire. Amen.



SERMON II.

SVR CES PAROLES DE

SIEAN

Chap. 12. v. 31.

31. Maintenant le Prince de ce Monde sera ietté dehors :

TRES-CHERS FRERES.

Vsii-tost que l'homme eut peché, Dieu en sa presence prononça contre Satan qui l'auoit seduit, cet Oracle,

Ie mettray inimitié entre toy & la femme, entre la semence & la semence de la femme, elle te briscra la teste, & tu luy briseras le talon. Cet Oracle qui au regard de Satan, estoit vne prediction de la vengeance terrible que

Genef. 3.

de S. Iean chap. 12. V. 31. Dieu vn iour deuoit prendre du tort qu'il auoit fait à l'homme par ses ruses; au regard de l'homme estoit vne promesse du salut que Dieu luy auoit destiné pour le releuer de sa cheute : en laquelle il pouuoit considerer ces trois choses entre les autres. La premiere qu'encore que par sa desobeyssance il se fut rendu, autant que Satan, digne de toute malediction; Dieu neantmoins auoit eu pitié de luy dans son malheur; en cette compassion, auoit pensé au moyen de son restablissement, par lequel Saran fut frustré de son attente, & l'homme malgré l'enuie de cet aduersaire, remis en son premier bonheur. La seconde, qu'vn si glorieux restablissement se feroit par l'entremise d'vne personne qui seroit de la semence de la femme, c'est à dire vray homme, forty d'Adam, comme les autres, & participant d'vne mesme chair & d'vn mesme sang, mais doué d'ailleurs d'vne puissance infinie, seule capable

36 Sermon II. sur ces Paroles d'vne si grande entreprise. Et la troisiesme finalement, que ce restablissement de l'hommene s'accompliroit point qu'en suitte d'vn rude & sanglant combat auec Satan, qui s'opposant au dessein de Dieu, & voulant maintenir sa conqueste, attaqueroit le Redempteur des hommes en sa propre personne, luy briseroit le talon, c'est à dire la partie la plus contemptible de sa personne & la plus terrestre, celle auec laquelle il deuoit cheminer sur la ter-& y conuerser entre les hommes, mais qu'en fin il en auroit la teste écrasée & en seroit deconsit pour iamais.

Ces choses, di-je, qu'vn chacun des fideles des premiers siecles, pouuoient remarquer en cette premiere promesse du falut, engendroit en eux ce grand desir que tous ont eu de voir le jour heureux où toutes ces choses seront accomplies. Les Prophetes, dit S. Pierre, qui ont prophetisé de la grace qui vous est ad-

dressée se sont enquis de ce grand salut,

de S. Iean chap. 12. y. 31. & l'ont diligemment recerché, s'enquerans quand, & en quel temps l'Esprit prophetique de Christ qui estoit en eux, sonifioit les souffrances qui devoient aduenir au Christ & les gloires qui s'en deuoient ensuiure. Nous auons, tres-chers Freres, és paroles qui viennent d'estre leuë; deuant vous, l'accomplissement de cette anciene promesse, qui auec toutes les autres qui luy ont esté adjoustées de temps en temps pour son éclarcissement, àseruy à la cosolation des pecheurs és premiers âges du monde. A cause de cela le Seigneur Iesus disoit à ses Disciples, Bien-heureux sont vos yeux, car ils voyent, & vos oreilles, car Math. elles oyent; En verité ie vous di, que 13. plusieurs Prophetes & instes ont desiré de voir les choses que vous voyés & ne les ont point veues, & d'ouir les choses que vous oyes & ne les ont point ouyes. Nous auons di-je en ce texte cette importante victoire que le Christ deuoit remporter du Diable par ses fouffrances, & qui deuoit estre suiuie d'vne heureuse restauration de

Sermon II. sur ces Paroles toutes choses pour les homes, maintenant, dit le Seigneur, le Prince de ce monde sera ietté dehors. En ces paroles comme en celles qui les precedent & qui les suiuent, le Seigneur a égard à cet Oracle enuoyé du ciel de la part du Pere touchat son nom, Ie l'ay glorifié, & derechef ie le glorifieray, & a pour but de nous dire que le Pere recueilliroit des souffrances de son Fils vne glorification de son grand Nom, qui seroit suiuie de la restauration du monde, & de la destruction du Diable qui en tenoit l'empire. Il a parlé de la restauration du monde en ces mots, maintenant est le iugement de ce monde, l'heure est venuë que toutes les merueilles que Dieu s'est proposé de faire pour la redemption des hommes, doiuent estre glorieusement executées, il parle de la destruction du Diable en ceux cy, maintenant sera le Prince de ce monde ietté dehors. Et il fait rencotrer en mesme temps la restauration du monde & la destruction du Diable, pource que par

de S. Iean chap. 12. \$\forall. 39. I'écrasement de la teste de ce Serpent ancien le monde deuoit estre sauvé. Il y a donc icy trois choses, qui auec l'aide du Seigneur seront le suject du present exercice, à sçauoir, 1. celuy qui est icy entendu par le Prince de ce monde. 2. l'empire qui luy est attribué, & 3. son expulsion.

PREMIER POINT.

Et pource qui est du premier de ces points. Quand en la nature nous agençons les estres selon les degrez de perfection qu'ils ont les vns au dessutres, pour en faire comme vne eschelle semblable à celle que Iacob vid en songe, par laquello du moindre des Estres nous montions au plus parfait d'où descendent tous les autres, c'est à sçauoir à Dieu; nous paruenons sans peine iusqu'à l'homme. Nous disons que ce qui a la vie auec l'estre est plus excellent que ce qui n'a que l'estre tout seul sans la vie; & ainsi mettons les plantes qui ont vie, qui se nourrissent du suc de la terre, qui

Sermon II. sur ces Paroles croissent & engendrent leurs semblables, chacune selon son espece; au dessus des metaux & des pierres, au dessus des elemens & des corps celestes mesmes, qui sont tous sans vie, de mesme nom & de mesme nature en toutes les parties qui les composent. Estans ainfi montez au dessus des corps simples & sans ame, nous disons encore, que ce qui a les sens auec la vie, est plus parfait, que ce qui n'a que la vie toute seule fans les sens; & ainsi mettons les animaux qui ont la veuë pour les choses qui se voyent, l'ouye pour les sons, le goust pour les saueurs, le flair pour les odeurs, le toucher pour les choses qui se manient, le sens commun, l'imaginatiue & les appetits qui la suiuent: Nous mettons di-je les animaux, qui dans leur vie ont toutes ces facultés & puissances au dessus des plantes qui en sont destituées, de mêmes pour monter de ce troisième échelon au quatriéme, nous disons que ce qui a la raison auec les sens, par laquelle

de S. Iean chap. 12. y. 31. on iuge de ce qu'on void, de ce qu'on oit, de ce qu'on flaire, de ce qu'on gouste, de ce qu'on touche, tantost assemblant les idées de l'imagination, tantost les separant, pour de leur conionction ou separation recueillir les sciences qu'on en peut auoir, & les verités eternelles qui y sont renfermées: Nous disons, di-je, qu'vn estre qui est doué d'vne si admirable faculré, est plus excellent que celuy qui en est destitué, & ainsi mettons l'homme en qui cette intelligence se rencontre auec les sens, au dessus des animaux qui n'ont que les sens sans intelligence.

En cette maniere, comme nous auons dit, nous montons sans peine iusqu'à l'hôme. Mais pource que ce qui est au dessus, que ce qui est au dessous; cela fait que nous auons plus de peine à monter plus haut iusqu'au bout où on peut aller, en quoy nous est en grand empeschement l'amour que nous auons pour

A2 Sermon II. sur ces Paroles nous mesmes, qui contemple auec plaisir ce qui est moindre que nous, mais ne regarde iamais qu'auec enuie ce qui est plus excellent. De là est venuë l'impieté des Athées, & l'erreur des Sadduciens : celle la qui fait de l'homme vn Dieu & n'en recognoist point d'autre; celle cy qui entre l'homme & Dieu ne reconnoist point d'autre estre qui au dessous de Dieu, soit plus excellent que l'homme. La gloire de la diuinité qui reluit par tout en ses ouurages, & la frayeur que les consciences des hommes en ont naturellement, conuainquent de fausseté, l'impieté des Athées. Quant à scauoir si entre Dieu & l'homme, il y a vn estre plus parfait que celuy de l'homme, on le peut découurir en remarquant dans l'intelligence de l'homme, qui est sa plus haute perfection, ces deux imperfections essentielles: l'vne que quelque grade qu'elle puisse estre elle n'est pas infinie, mais bornée en sa capacité & en sa puissance, selon que le sujet

de S. Iean chap. 12. V.31. où elle est logée, est de tres petite estenduë, allant bien d'vne chose à l'autre iusqu'à l'infiny, mais ne le comprenant iamais; cela mesme qu'elle ne peut comprendre toutes choses dans vn instant, est vn argument certain de sa foiblesse. L'autre imperfection qui se remarque en nostre intelligence, est que bien qu'elle soit d'vne nature toute spirituelle, & par consequent immortelle; elle se trouue neantmoins faite pour estre l'ame d'vn corps qui a diuers organes, desquels il luy faut dependre en ses raisonnemens & pensées, ce qui rend ses raisonnemens longs & pesans, sujets à beaucoup d'erreur & de tres petit effect à cause de la foiblesse du corps ou elle est logée. Come donc la droite raison nous dicte qu'vne intelligence infinie, est incomparablement plus excellente qu'vne bornée, aussi nous dicte t'elle qu'au dessous de cette intelligence infinie, qui est Dieu, celle qui est detachée de toute matiere & independente de

44 Sermon II. sur ces Paroles

tout organe corporel en ses operations, qui n'a pas esté faire pour estre partie mais pour faire vn tout à part entre les estres, est plus excellente que celle de l'homme, qui porte par tout son fardeau auec elle, & ne le peut quitter qu'en la mort. Que si au dessous de Dieu, on se peut imaginer vne intelligence plus pure plus viue, & plus active que celle de l'homme, pourquoy d'vn plein saut monteroit on de l'homme à Dieu, sans s'arrester à ces intelligences, lesquelles de necessité, si on ne veut rendre l'ordre & l'enchaineure des estres defectueuse & rompuë, doiuent estre entre Dieu & les hommes.

G'est donc icy la place où se trouuent ses Esprits, qui en l'Escole du Seigneur Iesus sont appellés les Anges à cause de leur employ, Dieu s'en seruant enuers le reste de ses creatures pour l'execution de ses saintes volontés; soit pour les vengeances qu'il exerce dessus les méchans, à cause dequoy ils sont ap-

de S. Iean chap. 12. y. 31. pelés Anges destructeurs, tel qu'estoit celuy qui tua tous les aisnés d'Egypte dans vne nuict, & celuy qui défit l'armée de Sancherib Roy des Assyriens; soit pour la deliurance des enfans de Dieu, ce qui les fait appeler Esprits administrateurs, enuoyez Heb. r. pour l'amour de ceux qui doiuent obtenir l'heritage de salut. Outre cela, la parole du Seigneur nous apprend touchant ces Esprits separés de toute matiere, qu'ils sont par millions, c'est à dire dans vne multitude presque infinie, comme seroit celle des hommes qui couurent le dessus de la terre. De plus, que c'est vne multitude où il y a de l'ordre, comme il y en a entre les hommes, qui rend les vns superieurs aux autres en dignité & en puissance; voila pourquoy l'Escriture parle de la multitude des Anges comme d'armées celestes, à cause de l'ordre qui y est, comme dans vne armée, où il ya diuers degrez de commandemens, & vn qui preside sur tout : selon cela S. Paul leur attribuë des Thrônes, Colos,

46 Sermon II. sur ces Paroles des dominations, des principautez & des puissances, en suitte dequoy il y en a qui sont appelés Archanges, c'est à dire Princes entre les Anges & des Anges. La mesme parole du Seigneur qui nous découure touchant les Anges, ce que les seules lumieres de la nature ne nous peuuent enseigner, nous apprend que tous ces esprits ayans esté crées de Dieu dans vne integrité conuenable à la pureté du Createur, n'ont pas tous gardé leur origine, appelans ceux qui en sont descheus, Esprits immondes, Anges de tenebres, malices spirituelles. Et cette cheutte ayant comencé par quelqu'vn de ses principaux Esprits qui auoit principauté & domination furles autres, & ayant esté suiui par ceux qui dependent de luy; le chef de cette multitude d'Esprits reuoltés, est celuy qui est appelé le Diable, Satan, le Scrpent ancien, le Pere de mensonge, le Prince des Diables, le Prince de la puissance de l'air, le Dieu de ce siecle, le Prince de ce monde, & d'autres tels noms

de S. Iean chap. 12. ŷ. 31. 47
qui ont raport à sa malice, à la haine
qu'il porte aux hommes, aux ruses
qu'il employe pour les tromper, à
l'efficace qu'il a dans ses mensonges
& autres telles choses que nous laissons maintenant en arrière, pour
considerer seulement le tiltre de
Prince de ce monde qui luy est icy
donné, sans doute au regard de
l'empire qu'il a au monde qui est
la seconde chose que nous auons
à considerer en nostre texte.

SECOND POINT.

Il est certain, Tres-chers Freres, que le monde (scit qu'on le prenne pour l'assemblage des Cieux & de la Terre, soit qu'on le prenne pour le genre humain qui en est la principale partie, & celle à laquelle toutes les autres se rapportent) ne peut estre plus legitimement assujet ny plus heureusement gouverné que par celuy qui l'a crée: car si le potier a droit dessus ses vaisseaux pour en faire ce qu'il veut, pourquoy le Createur du monde, n'auroit - il point toute sorte de droit & de

puissance sur le monde son ouurage: & si Dieu en le faisant y a emloyé vne bonte, vne sapience & vne puissance infinie, le pourroit-il gouuerner & conduire autrement que par les mesmes vertus qui luy ont donné l'estre ? Il est certain encore que bien que le monde ne puisse auoir d'autre legitime Seigneur que celuy qui l'a fait; Dieu ne laisse pas de faire part de cet honneur à quel-ques vnes de ses creatures, qui en cela portent son image & regnent en son nom, & par son ordre sur leurs semblables. Selon cela ils se rrouue entre les hommes comme entre les Anges, des thrônes, des dominations, des principautez, & des puissances estimées legitimes, pource qu'elles viennent de Dieu & de son ordonnance. La premiere chose donc qu'on doit remarquer dans l'empire que le Diable a en ce monde, est qu'il ne vient point de Dieu, en cela mesme est illegitime comme vsurpé sans droit & digne de toute execration.

De plus

de S. Iean chap. 12. y 31. De plus il est certain, que ce qui n'est point de Dieu est contre Dieu; car Dieu estant la souueraine loy de toutes choses, il ne peut approuuer & rien ne luy peut estre con-uenable que ce qui procede de luy. La seconde chose donc qu'on doit remarquer en l'empire que le diable pretend en ce monde, est qu'il est directement opposé à celuy que Dieu y doit auoir, soit au regard de la fin, soit au regard des moyens qui y tendent. Car le but du regne de Dieu est d'assujetir les hommes à Dieu en toute obeyssance; mais le but de l'empire du Diable est de tirer les hommes de l'obeyssance de Dieu, pour les assujetir à soy mesme. De là vient que celuy qui est appelé le Prince de ce monde, ailleurs est appelé le Dieu de ce siecle, 2. Corpource que par l'empire que le Dia-4. ble a au monde, il est mis en la place de Dieu, receuant de ce monde

l'honneur & le seruice qui deuroit estre rendu à Dieu. Ainsi S. Paul disoit que les choses que les Gentils

so Sermon II. sur ces Paroles r. Cor. sacrifioient aux idoles, ils les sacrifioient au Diable, opposant là mesme, la ta-IO. ble du Seigneur à la table des Diables, comme deux choses incompatibles, à l'vne desquelles il faut renoncer pour participer à l'autre. Le but du regne de Djeu en assujetissant les hommes à Dieu, est de les rendre eternellement heureux en la communion de Dieu: Mais le but de l'empire du Diable, en tirant les hommes de l'obeyssance de Dieu, est de les perdre & tuer & se les rendre compagnons des tourmens eternels qu'il sçait luy estre preparez. Voila pourquoy Dieu en son regne est appelé le Pere de son peuple, & Ican 10 Satan dans le sien est appelé le meur-trier des hommes. Voila pourquoy, encore le regne de Dieu est appelé vne couronne de vie, vn thrône de grace, vn sceptre de justice, mais Heb. 2 l'empire du Diable est appelé l'em-pire de mort. Et comme Dieu en son regne suit vne conduite conuenableà son but, illuminant les cœurs des hommes de sa conoissance pour

de S. Iean chap. 12. y. 31. s'en faire aimer & obeyr, & leur proposant l'esperance qu'il leur reserue en sa maison, pour les réjouïr & consoler: De mesme à l'opposite, Satan dans son empire suit vne pratique conuenable au malheureux dessein qu'il y a, il aueugle les yeux des entendemens des incredules, à ce que la lumiere de la gloire de Dieu qui reluit en la face de Christ, ne leur resplendisse. Et au lieu des esperances du Ciel leur propose les vanités de la terre; voila pourquoy le Royaume de Dieu est appelé vn Royaume de lumiere où les esprits font éclairez d'vue verité qui ne les peut tromper; mais l'empire du Diable est appelé la puissance de te-Colos. nebres, pource qu'il ne subsiste que dans l'ignorance du monde, & par les mensonges qui seduisent les hommes, d'où vient que là où l'ignotace des hommes est plus grande, là l'empire du Diable est plus absolu. Ainsi sembloit - il regner absolument entre les Gentils, dans les temps de leur ignorance, Alors

Gal. 4. que ne connoissans point Dieu, ils seruoient à ceux qui de nature ne sont
point dieux, & idolatroient apres les
œuures de leurs mains. Satan auoit
alors ses Oracles par lesquels il répondoit à ceux qui le consultoient,
il auoit ses Autels, ses Sacrificateurs,
& ses mysteres, par lesquels il se faifoit seruir, & punissoit autant qu'il
le pouuoit, par diuerses calamités
qu'il suscitoit au monde, les fautes
& les mépris qu'on commettoit à
fon seruice.

Apres tout, il est certain, que quelque grande que soit la puissance du Diable, & sa haine contre Dieu; ce n'est tousiours que la puissance d'vne creature, qui ne peut preualoir dessus celle du Createur qui est infinie. La troisième chose donc qu'on doit icy remarquer, est que Satan ne peut auoir d'empire au monde, que ce que Dieu luy en permet, & cet empire du Diable se trouuant si malheureux pour les hommes, cette permission de Dieu ne peut estre qu'vn esset de son

de S. Iean chap. 12. V. 31. iuste courroux, abandonnant les homes à l'empire du viable, quand ils méprisent l'empire de Dieu, & se reuoltent de son obeissance. Ainsi par le peché l'empire du piable s'est estably au monde, où l'iniquité se multiplie, là le regne de Satan s'affermit. Cet esprit tenebreux n'a d'efficace qu'és enfans de rebellion, Dieu enuoiera efficace d'erreur, dit S. 2. Thes Paul à ce que les hommes croyent à 2. mensonge, d'autant qu'ils n'ont point receu la dilection de verité pour estre saunez. Et c'est ce qui fait que Satan regne en ce monde, sans que le monde s'en apperçoiue; la force de son empire s'exerçant dessus les efprits des hommes qui luy sont abandonnez, lesquels il possede par diuerses convoitises dont il les tient entortillez. L'empire du Diable en ce monde est semblable à celuy de Pharao sur les Israëlites, aussi cetuycy a t'il esté type de l'autre; mais la tyrannie de Pharao n'estant que corporelle, elle n'ostoit pas à l'ame le sentiment qu'elle en auoit, & ne

Sermon II. sur ces Paroles l'empeschoit pas de crier à son Dieu & de soupirer apres sa deliurance: mais la tyrannie du Diable s'exerçant sur les esprits, la premiere chose qu'elle fait, est qu'elle oste à l'ame sa liberté, luy fait oublier ce qu'elle est, la rend esclaue de ses affections charnelles qu'elle deuroit commander, & ainsi la rend insensible à son propre malheur, reputant son bonheur ce qui est sa mort & sa honte. De là vient la difficulté qu'il y a de chasser Satan de son empire, ceux là sans y penser combattant pour luy, qui deuroient combatre contre luy, & retenans auec vne obstination inuincible la malice qui donne à Satan tout empire dessus eux. C'est donc icy où nous auons à considerer la promesse du Seigneur : Maintenant sera le Prince de ce monde &c.

TROISIESME POINT.

Quand vn homme fort & bien armé
Luc II. garde son hostel, dit le Seigneur, les
choses qu'il a sont en scureté, mais si vn
plus fort que luy suruient qui le surmonte, alors il luy oste toutes ses armes

de S. Iean chap. 12. y. 31. esquelles il se confioit, & départit les dépouilles. Ces paroles seruent de commentaire au texte que nous exposons, & nous apprennent que quelque puissant que soit Satan en son empire, il deuoit estre choqué par vn plus puissant que luy, à sçauoir par le Christ de Dieu, qui a auec soy la puissance de Dieu, à laquelle il faut que tout autre cede. Elles nous apprennent encore que le comencement de la destruction de l'empire du piable, se denoit faire par les armes esquelles il se confioit: or se confioit-il dans son empire, en la malediction du genre humain, que le iuste courroux de Dieu luy auoit abandonné, en l'efficace d'erreur auec laquelle il fait des meschans ce qu'il veut, & dans l'impuissance où ils se trouuent de resister à ses dards enflammés, ou de s'en apperceuoir mesme. Ostant donc ces armes à Satan, changeant la malediction des hommes en benediction, leurs tenebres en lumiere, l'efficace d'erreur en l'efficace de verité & leur

sermon II. sur ces Paroles impuissance en force; il faut qu'il dechée du tout de l'empire qu'il auoit dessus eux, & que ce qu'il auoit pillé par ses ruses & ses menfonges, retourne à son legitime Seigneur.

En ces paroles donc, maintenant sera le Prince de ce monde ietté dehors. Le Seigneur a premierement égard au but de sa venuë au monde, qui a esté de destruire l'empire du piable & restablir le regne de Dieu entre les hommes qui ne le connoissoient point. La puissance de tenebres n'est pas vn œuure de Dieu, mais du Diable; Or il est apparu, dit S. Iean, afin qu'il défit les œuures du Diable. Estant donc tout prest de satisfaire au but de sa venuë au monde, estant dans le moment où il alloit mettre la main à ce grand œuure par sa mort, il dit maintenant le Prince de ce monde sera ietté hors, son empire ne peut subsister dauantage, il faut qu'il finisse auec honte. De plus le Seigneur a icy égard au merite de sa mort enuers Dieu, à l'efficace

de S. Iean chap. 12. ¥.31. 57 qu'elle auroit enuers ce Pere celeste, pour luy faire oublier nos pechez & nous reconcilier auec luy. Sans cette mort Satan se presente hardimet deuant Dieu contre nous; il vient auec la loy de Dieu en la main, & forme la dessus ses accusations, nous conuainquant de transgression en nos pensées, en nos paroles, en nos œuures, contre l'vne & l'autre table de la loy, & demandant que selon la verité de Dieu, iustice soit faite & sentence de mort & malediction prononcée contre nous, mais le sang de Christ nous nettoyant de 1. Iean toute iniquité, ce Fils ayant esté fait ma-1. lediction pour nous, afin de nous racheter Gal. 3. de la malediction de la loy; toutes les accusations de Satan deuiennent nulles, il n'est plus ouy deuant Dieu Rom,8 qui nous iustifie, la verité de Dieu qui parloit contre nous & rendoit Satan si hardy, parle maintenant pour nous & luy répond qu'il n'y a Ibidem maintenant plus de condamnation pour ceux qui sont en Iesus-Christ. C'est le sujet de cette action de grace des fideles au 12. de l'Apoc. Maintenant

58 Sermon II. sur ces Paroles est au Ciel le salut & la force & le regne de nostre Dieu & la puissance de son Christ, car l'accusateur de nos freres est dejetté qui les accusoit deuant nostre Dieu iour & nuict, mais iceux l'ont vaincu à cause du sang de l'Agneau. Ainsi aux Heb. 2. l'Apostre enseigne que Christ par sa mort a destruit celuy qui auoit l'empire de mort, c'est à sçauoir le Diable, & a deliurez tous ceux qui pour crainte de mort estoient toute leur vie assujettis à seruitude. Le Seigneur donc estant prest d'épandre son precieux sang pour l'abolition de nos crimes, dit sur ce sujet maintenant sera &c.

Le Seigneur, outre le but de sa venuë au monde & le merite de sa mort, a icy égard à l'efficace de la predicationde son Euangile, qui est la puissance de Dieu en salut a tout Cor. 3. croyant, & le ministere de l'Esprit, qui deuoit dissiper l'ignorance des hommes, surmonter leur incredulité, sanctifier leurs affections, & les faire nouuelles creatures. Au leuer de cette diuine lumiere, toutes les te-

Rom.

de S. Iean chap. 12. V. 31. nebres que Satan auoit épanduës sur la terre pour y regner, se devoient dissiper, les dieux des Gentils deuoient perir, leurs Autels deuoient estre destruits, leurs Oracles se taire, leur nom deuoit deuenir execrable, & la crainte de l'Eternel & de son Christ deuoit se répandre sur toutes nations. Que pourroit faire le Prince de tenebres auec ses mensonges, contre vne si grande lumiere, accompagnée és cœurs des éleus de Dieu, de l'excellente grandeur de la force de Dieu, par laquelle il resuscite les morts? ne faut-il pas qu'en ce moment là, il s'enfuye en cedant au plus fort. Ain i les 70. Luc. 10 que le Seigneur auoit enuoyés deuant luy prescher la parole de son Euangile, estans retournez tout joyeux du succés de leur ministere, auquel les piables mesmes auoient esté assujetis; Le Seigneur leur dit, Ic conteplois satan tombant du Ciel come vnéclair, voicy ie vous done puissance de marcher sur les serpens & les scorpions & sur toute la puissance de l'ennemy, &

rien ne vous blessera. Le Seigneur doc estant à la veille de faire retentir la voix de son Euangile par toutes nations, à cause de cela mesme a peu dire en toute verité, maintenant le Prince de ce monde sera ietté dehors.

Outre cette efficace de l'Euangile, le Seigneur a icy égard à la puissance de sa prouidence, s'opposant aux derniers efforts de Satan qu'il deuoit employer pour la manutention de son empire. Cet ennemy voyant ses accusations rejettées deuant Dieu, & ses mensonges s'éuanoüir à la splendeur de l'Éuangile, tout plein de rage & de fureur, entreprend de persecuter à force ouverte les Disciples de la verité, pour la leur faire abandonner, & empescher les autres de l'embrasser. C'est ce qui nous est remarqué au 12 de l'Apoc. fort au long sous le type du dragon persecutant la femme dont l'enfant auoit esté rauy à Dieu, & ce que le Seigneur fignifioit à S. Pierre, quand il luy dit, simon, side S. Iean chap. 12. §. 31. 61
mon, Satan a demandé de vous cribler Luczis
comme le blé, mais i'ay prié pour toy
que ta foy ne defaillit point. Auec
cette foy nous esteignons tous les
dards enslammés du malin, nous resistons au piable, & il s'ensuit de
nous, l'esprit qui est en nous est plus
fort que celuy qui est au monde.
Mais outre cela, Dieu reprime par
sa puissance la fureur de cet ennemy, fait seruir ses persecutions contre luy mesme, à l'aduancement du

regne de son Christ, & en arreste le cours comme bon luy semble, pour le soulagement de son peuple. A quoy se peut raporter ce qui est predit au 20. de l'Apoc. touchant l'emprisonnement de Satan dans l'abisme, & le regne de mille ans qui s'en doit ensuiure. Le Seigneur Iesus donc se voyant à la veille de s'asseoir en suitte de ses soussances à la dextre de Dieu, au dessus de toute principauté & puissance, c'est auec toute raison qu'il dit, maintenant le Prince &c. mais apres toutes ces victoires remportées sur Sa-

tan & son empire, il faut qu'vn iour il soit solemnellement jugé à la face de toute creature, & enuoyé pour iamais au seu eternel qui luy est preparé. Alors ces deux paroles se trouueront pleinement veritables, Maintenant est le jugement de ce monde, maintenant le Prince de ce monde est ietté dehors, le parfait dechassement de Satan, estant la parfaite restauration de ce monde.

APPLICATION.

Ces choses ainsi expliquées, nous fournissent, en nous les appliquant, diuerses instructions. En premier lieu, quand vous voyés qu'il y a au dessus des hommes, dans l'ordre des estres des intelligences plus pures, plus viues, plus affranchies de la pesanteur des corps que la nostre. Iugés, chers Freres, par là quel sera l'estat des sideles apres la resurrection, & à quel degré de persection nostre nature doit estre éleuée en ce siecle là bien-heureux; puis que selon la parole du Seigneur Iesus, ceux qui seront reputés dignes d'ob-

de S. Iean chap. 12 \(\forall \). 31. 63 tenir ce siecle là & la resurrection des justes seront rendus semblables aux Anges de Dieu, non seulement au regard de l'immortalité, mais aussi au regard de l'intelligence, qui alors ne sera plus offusquée des imaginations de la chair & de ses affections, mais dans vn corps tout spirituel & tout celeste, doit estre toute spirituelle & celeste de même, & susceptible de la resplendeur immediate de la face de Dieu.

Quand vous voyés II. que quelques vnes de ces plus nobles intelligences qui sont au dessus de nous, nonobstant tous les auantages de leur esprit, sont décheuës de l'integrité de leur origine dans vne condamnation sans remede. Considerés de quelles cheutes nous sommes capables, dans l'ignorance qui nous enuironne, en la foiblesse de nostre intelligence, & parmy les mensonges où elle est continuellement exposée. Que celuy donc qui est debout regarde qu'il ne tombe, Ne nous sions iamais tant en nostre esprit, quelque

64 Sermon II. sur ces Paroles net qu'il nous semble, que nous ne pensions tousiours qu'il peut faillir. Et puis qu'il semble que rien n'a peu ébranler l'integrité des Anges, que l'enuie qu'ils ont portée à la gloire de l'homme, que Dieu auoit estably dominateur sur toutes ses œuures; pensés que cette passion tandis qu'elle possedera vos ames, n'y laissera rien d'entier que l'amour de nous mesines, qui l'engendre, que l'appetit d'vne vaine gloire qui l'accompagne, mettront tout en defordre en vos cœurs, brouilleront vostre lumiere, & vous rendrent susceptibles de toute meschanceté.

Quand vous voyés III. qu'en suitte de la desobeyssance de l'homme, ce monde a esté abandonné à Satan, pour en estre le tyran, l'executeur & le bourreau, imputés à ce Prince de tenebres tous les maux que vous voyés au monde. Si l'yuroye se trouue messée auec le bon grain, dites comme le Seigneur, c'est l'ennemy qui a fait cela: si la guerre consume les hommes, si la famine

de S. Iean chap. 12. y. 31. les deuore, si la peste les emporte à milliers, dites que c'est le meurtrier des hommes, qui par ses seductions les acharne les vns contre les autres, que c'est le Prince de la puissance de l'air, qui infecte tout par ses poisons, que c'est l'Ange destructeur qui exerce l'empire de mort qui luy a esté donné. Si en fin la terre se voit couuerte d'ignorance, si l'esprit des hommes se remplit d'impieté, & attribuë à vn homme mortel la gloire qui n'est deuë qu'à leur Redempteur, dites que c'est le Dien de ce siecle qui aueugle les entendemens des incredules, à ce que la lumiere de l'Enangile de la gloire de Christ qui est l'image de Dieu ne leur resplendisse. Que c'est l'esprit de ce monde qui agit auec efficace és enfans de rebellion, que c'est le dragon qui a donné sa puissance à la beste, son siege & grand pouuoir, afin de regner par elle, comme il auoit regné sans elle és tenebres du paganisme, & puis que la desobeyssance de l'homme a eu des suittes si

66 Sermon II. sur ces Paroles

horribles, que deuons nous penser de toutes les desobeissances que nous y auons adjoustées. Quels malheurs n'attirons nous point sur nos testes par nos pechez, quelle condamnation n'agrauons nous point: dessus nous, par les mépris que nous faisons de la parole du Dieu du ciel, qui deuroit estre toute nostre lumiere & nostre consolation. Sachés donc que Satan ne regne au monde que par l'iniquité du monde, afin que vous ne pésiés pas estre exempts de cet empire tenebreux, tandis que vous ne le serez pas d'iniquité; se plaire dans le peché, est afermir l'empire du Diable, qui n'a de pouuoir dessus les hommes, que ce qu'eux mesmes luy en donnent par leur meschanceté.

En fin considerés qu'il n'y a qu'vn seul Seigneur Iesus qui puisse ietter Satan hors de son empire & en deliurer les hommes, afin que vous n'ayés point de recours ailleurs qu'à cette croix du Fils de Dieu pour vostre deliurance. Là vous trou-

de S. Iean chap. 12. V. 31. 67 ueres le sang qui vous laue de tout peché, l'Esprit qui vous affranchie de toute seruitude d'iniquité, la resurrection qui vous deliure de toute crainte de mort. Vous tenans à cette croix, y cerchans toute vostre justice, y fondans toutes vos esperances; Satan n'aura plus rien en vous, il sera brisé dessous vos pieds, vous triompherés de toute sa puissance: où il seduit les autres, vous connoistrés ses ruses, où il maltraitte les autres sans qu'ils s'en aperçoiuent, vous luy resisterés & il s'enfuira de vous, où il abbat les autres par le choc de ses tentations, vous demeurerés fermes conrre luy, soustenus de la force de Dieu, & du sentiment agreable de la dilection de celuy qui s'est donné pour vous. A luy comme au Pere & au S. Esprit vn seul vray Dieu benit eternellement, foit honneur & gloire, & force és siecles des siecles. Amen.



SERMON III.

SVR CES PAROLES DE

S. IEAN.

Chap. 12. y. 32.

32. Et moy si ie suis enleué de la Terre ie tireray tous hommes à moy.

TRES-CHERS FRERES,

N la nature la corruption d'vne chose est la generation de l'autre. Car tout ce qui se fait, se faisant de son contraire; il faut qu'il cesse d'estre ce qu'il estoit pour deuenir ce qu'il n'estoit pas. Ce que l'Apostre reconnosse au chap. 11. des Heb. en parlant de la creation, par foy, dit-il, entendons nous que les

de S. Iean chap. 12. y. 32. 69 siecles ont esté faits par la parole de Dicu, de sorte que les choses qui se voyent ont esté faites de celles qui n'apparoissoient point. Selon cette reigle de nature, il faut que le grain de froment tombant en terre y meure, auant que de produire son fruict, il faut que l'œuf perisse, afin que l'animal s'en engendre, & que le iour succede à la nuict, la dissipation des tenebres, estant l'introduction de la lumiere mesme. Ce qui a lieu és productions de la nature, se void encore és choses morales & politiques': car comme de la corruption de la vertus engendre le vice, ainsi de la destruction du vice s'engendre la vertu. Au mesme temps qu'vn homme cesse d'estre intemperant, il commence d'estre sobre, & de méme en la politique, ce sont les desordres qui engendrent les bonnes loix, & abolir la tyrannic, est establir vn iuste gouvernement. Cette reigle apres tout a lieu dans la religion, sur tout depuis qu'elle est deuenue estrangere en la terre, elle

70 Sermon III. fur ces Paroles naist de la destruction de son contraire de l'ignorance du vray Dieu, on passe immediatement à sa connoissance salutaire. Vous estiez au-Ephel. tres fois tenebres , dit S. Paul , mais maintenant vous estes lumiere au Seigneur. De la puissance du peché quand elle est destruite, on passe fous le regne de iustice qui luy est Rom 6 oppose: estans affranchis de peché, dit S. Paul, vous estes, faits serfs quant à la instice. De la crainte de la mort on passe à l'esperance de la vie. Qui Ican s. croit en moy, dit le Seigneur, ne viendra point en condamnation, mais est passé de la mort à la vie. La dessus les morts oyans la voix du Fils de Dieu, r. Cor. s'escrient de ioye, où est o mort ta victoire, où est à sepulchre ton aiguillon? grace à Dieu qui nous a donné deliurance par Icsus Christ nostre Seigneur.

Tres-chers Freres, en la Religion rien ne peut estre plus contraire, que Christ & Belial, le regne de Christ & l'empire du Diable: comme le Christ de Dieu est mesprisé où Satan regne par son essicace d'erreur;

de S. Iean chap. 12. V. 31. ainsi faut-il que l'empire du Diable soit aboly, où le Christ s'empare des esprits des hommes par l'efficace de sa verité. C'est à cela qu'à regardé le Seigneur Iesus és paroles qui viennent d'estre leues en vostre presence, ayant posé pour infallible la destruction de l'empire du piable, en disant, maintenant le Prince de ce monde sera ietté dehors, il en conclud l'establissement de son regne, adjoustant, & moy si ie suis enleué de la terre ie tireray tous hommes à moy. Ce qui estoit dire que les hommes sortans de dessous la tyrannie du Diable, se rangeroient sous l'obeissance iuste & glorieuse du Seigneur Iesus. Icy donc nous aurons, auec l'aide du Seigneur, à considerer ces trois principaux points. A sçauoir, premierement l'opposition que le Seigneur fait de soy mesme au Prince de ce monde. En second lieu, l'attraction de tous homes au Seigneur, opposée à l'empire que le piable auoit auparauant en ce monde, & finalement l'élevation du Scigneur

de la terre servant à luy attirer tous les hommes, opposée à l'expulsion du Prince de ce monde.

PREMIER POINT.

Et pour ce qui est du premier de ces points, l'opposition que le Seigneur fait de soy mesme au Prince de ce monde, est exprimée en ces mots & moy, car celuy qui parle de la sorte, se compare tacitement auec vn autre, & si cet autre luy est contraire ces mots, & moy, valent autant que ceux cy, mais moy, qui est se comparer auec yn autre, en s'opposant à luy, comme cela se void en la comparaison que le Seigneur fait de sa parole auec les traditions des. Anciens au chap. 5. de S. Mathieu, vous auez ouy qu'il a esté dit tu aimeras ton prochain & hairas ton ennemy; Mais moy ie vous di, aimés vos ennemis &c. opposant ainsi son dire à celuy des Anciens. La premiere chose donc que cette opposition, que le Seigneur fait de soy mesme au Prince de ce monde, nous represente, est qu'estant yray homme comme

de S. Iean chap. 12. y. 32. 73 nous, & cheminant sur la terre, où Satan regne, ce Prince de ce monde, n'auoit rien en luy de ce qu'il a au reste des hommes. Car viure au milieu de l'empire du piable sans tenir rien de luy ou luy estre sujet, c'est luy estre contraire. Satan a au reste des hommes le peché, qui luy donne entrée en leur cœur, & les soûmet à son efficace tenebreuse; mais le Seigneur Iesus n'a point connu peché, il est le seul iuste, le feul saint, innocent, sans macule, le seul separé des pecheurs qui ait esté & sera au monde, depuis que le peché y est entré. Satan voyant que sans le peché il n'auroit iamais fur le Seigneur l'empire qu'il a fur le reste des hommes, le tenta au desert où l'esprit l'auoit transporté, comme il auoit tenté le premier homme dans le Paradis terrestre, non en luy rendant suspecte la verité de la parole de Dieu, comme il auoit fait en la tentation du premier homme, mais en se seruant de la parole de Dieu, pour l'obliger à

74 Sermon II.I sur ces Paroles faire quelque chose contre Dieu: mais le Seigneur ayant repoussé toutes ces tentations par la parole de Dieu mesme, Satan est contraint de le quitter, comme vne personne sur laquelle il ne pouuoit rien gaigner. Satan encore a au reste des hommes la malediction de Dieu qui luy donne tout empire de mort dessus eux, par le moyen duquel il exèrce sur eux sa rage & sa fureur. Mais comme le Seigneur Iesus est le saint de Dieu , aussi en est il le bien-aimé, & celuy en qui il prend tout son bon plaisir : ainsi autant du costé de la malediction diuine que du costé du peché qui l'engendre, il se trouve que Satan n'a rien du tout au Seigneur Iesus, de ce qu'il a au reste des hommes. Que si celuy qui n'a point connu peché, a esté fait peché pour nous. Si le bien-aimé du Pere a esté fait malediction pour nous; cela n'est pas venu de la puisfance du Prince de ce monde, mais de la sapience de Dieu, & de la charité de son Fils, qui volontairement

de S. Iean chap. 12. v. 31. 75
s'est soumis à la mort, alors qu'il la
pouvoit éviter, afin de nous en deliurer. C'est ce que le Seigneur à
la veille de sa mort, voulut faire remarquer à ses Disciples, afin qu'ils
n'en sussent point scandalisez, leur
disant, Ie ne parleray plus gueres avec
vous, car le Prince de ce monde vient sean 14
c'n'a rien en moy; mais c'est asin que le
monde connoisse que i aime le Pere, c'es
fay ainsi que le Pere m'a commandé.

Que si le Seigneur Iesus desia se trouue opposé au Prince de ce monde, en ce que Satan n'a rien en luy : il luy est encore opposé au regard de son affection enuers le monde. Car l'affection du Prince de ce monde enuers le monde, est vne affection meurtriere, qui ne se delecte que dans le sang des hommes, & és choses qui les perdent, & les accablent de toutes sortes de calamitez: Mais l'affection du Seigneur lesus enuers les hommes, est vne affection de charité, qui a compassion de leurs miseres, & selon l'émotion de ses entrailles, s'em-

76 Sermon III. sur ces Paroles ploye pour leur soulagement & deliurance. Ainsi au lieu que Satan est sean soentré au monde comme un larron qui ne vient sinon pour dérober, tuer & destruire. Le Seigneur Iesus y est venu comme le bon Pasteur qui met sa vic pour ses brebis afin qu'elles ayent vice en ayent en abondance : Ie ne suis Luc s pas venu, dit-il, pour perdre les hommes mais pour les sauuer. Bref, ce Iesus qui se trouve opposé au Prince de ce monde entant qu'il ne tient rien de luy, & a pour les hommes vne affection de charité; contraire à la haine de cet ennemy; s'y trouue encore opposé au regard de son regne. Le Seigneur l'esus est né pour estre Roy, & pour cela il est venu au monde, l'empire qui luy a esté mis sur son espaule, est cetuy la mesme que Satan auoit vsurpé. Ainsi le Seigneur doit estre consideré icy non seulement comme vn Roy, mais comme vn Roy qui veut regner où Satan regne, qui vient contre le

Prince de ce monde pour le combatre & le dépouiller, dont par conde S. Iean chap. 12. \$\foralle{v}\$ 32. 77 fequent tous les desseins, tous les interests, & les armes doiuent estre directement contraires.

Dauantage ces mots, & moy, no denotent pas seulement opposition, mais vne opposition auantageuse pour celuy qui parle de la sorte, qui en cela pretend estre plus considerable que celuy qui luy est opposé. Ainsi le Seigneur opposant sa parole aux traditions des Anciens s'exprime ainsi, mais moy ie vous di, pour signifier que son authorité estoit à preferer à celle des Anciens. De mesme sainct Paul condamnant au 5. des Gal. l'vsage de la circoncision parmy les Gentils conuertis que les faux freres y vouloient introduire, disoit aux fideles, voicy moy Paul vous di, que si vous estes circoncis Christ ne vous profitera de rien, opposant l'authorité de son ministere à tout autre, ou la rendant plus considerable en l'Eglise qu'aucune autre dont on eut peu s'apuyer contre luy. C'est la force qu'ont ces mots, 6 moy, dans nostre texte, outre l'op-

78 Sermon III. sur ces Paroles position qui est entre le Seigneur Issus & le Prince de ce monde, comme entre deux puissans ennemis qui ont à se combatre; ils designent encore vne opposition, où tout l'auantage est du costé du Seigneur, qui dans le combat qui luy est appresté, vient à saran son ennemy, comme le Createur contre sa creature, comme le Fils de Dieu, contre vn de ces esprits qui le doiuent adorer, comme le Prince de paix & le Roy de justice, auec l'esprit de Dieu son Pere, son authorité, son amour, & sa benediction, contre le Prince de ce monde, plein de toute fraude, ennemy de toute iustice, execrable deuant Dieu auec ses œuures, & destiné auec ses Anges à vn feu eternel. De l'auantage qu'a le Seigneur Iesus sur le Prince de ce monde, iugez du succés du combat, & tenés pour tout déconfit celuy qui a vn si

En fin ces mots, & moy, qui denottent tantost vne simple opposition, tantost vne opposition auan-

grand & si puissant aduersaire.

de S. Iean chap. 12. y. 32. 79 tageuse pour celuy qui parle ainsi do foy mesme, denote aussi quelque fois vne opposition ou auec l'auantage que nous nous attribuons, nous tesmoignons du mespris de ce qui nous est opposé. Ainsi Herode pour se mocquer des Sages qui estoient venus d'Orient pour adorer le Seigneur à sa naissance, leur disoit enquerés-vous soigneusement du petit enfant & me le faites sçauoir, afin Math? que moy ausi i'y aille & que ie l'a-2. dore. C'est encore la force qu'ont ces mots, & moy, en nostre texte, ils n'emportent pas seulement vne opposition auantageuse pour le Seigneur, mais vne opposition dans la-1 quelle le Seigneur meprise son aduersaire, le tenant comme desia tout brisé sous ses pieds, & englouty en victoire auec toute sa puissance.

SECOND POINT.

Voyons maintenant pour nofire second point l'action de ce Prince glorieux, si contraire à satan le Prince de ce monde; elle nous est representée en ces mots, se tireray.

80 Sermon III. sur ces Paroles tous hommes à moy. C'est le changement qui doit arriver au monde de la destruction de l'empire du Diable. Ce tyran defait auec sa tirannie, il faut que ce qu'il auoit vsurpé contre tout droit, & retenu si longtemps auec tant d'efficace, retourne fous l'empire de son legitime Scigneur, & y soit ramené par sa puissance. Ces mots à moy sont emphatiques, & representent le bon-heur que les homes doiuent esperer d'vn si grand changement. Celuy qui nous veut attirer à soy, est le Fils eternel de Dieu, que peut on esperer de son regne en y entrant, que toutes choses diuines, tres-sainctes, tres agreables à Dieu & permanentes à tousiours? celuy qui nous veut attirer à foy est le bien-aimé du pere, qui s'est fait chair pour se faire nostre frere & nostre aisné; que peuton donc esperer de son regne en y entrant que toutes sortes de graces & faueurs de la part de Dieu, qui en nous donnant son vnique, le nous a donné auecl'amour eternel qu'il luy

de S. Iean chap. 12 V. 32. porte, & tout plein de sa benediction, afin que de sa plenitude nous puisions tous grace pour grace : que toutes sortes de charité, tendresse, dilection, misericorde, de la part de ce Fils, qui ne s'est pas fait nostre Frere pour nous hair comme des estrangers & des ennemis, mais pour nous aimer comme os de fes os , & Eph. 5. chair de sa chair, pour nous rendre enfans de Dicu, & heritiers de Dieu auec luy? Bref celuy qui nous veut attirer à soy est le Seigneur de gloire, le Prince de vie, qui a les clefs de l'Enfer & de la mort, qui fait descendre en la fosse & qui en fait remonter, doit iuger toute creature & rendre à vn chacun selon ses œuures, que peut on donc esperer de son regne en y entrant que de communiquer à sa vie, à sa gloire, à sa remuneration, changeant nos tenebres en lumiere, nostre iniquité en iustice, nos supplices eternels dans vn bon-heur tout diuin, & vne vie permanente à tous-jours. Vn si grand changement & si auantageux pour nous,

82 Sermon III. sur ces Paroles est le sujet de cette action de grace de l'Apostre 1. Col. Nous rendons graces au Pere qui nous a rendus capables de participer à l'heritage des Saints en la lumiere, lequel nous a deliurez de la puissance de tenebres, & nous a transportez auroyaume de son Fils bienaimé.

Outre l'auantage que nous rencontrons en ce changement à cause de la dignité, benediction, & puisfance du Seigneur qui nous reduit fous fa domination, on doit considerer icy le terme de tirer, dont le Seigneur se sert pour signifier son action dessus nous. Il ne dit pas tous viendront à moy, ie les y appeleray & conuieray par ma parole, mais il dit, ie les tireray tous à moy, ce qui est l'action d'vne souueraine puissance, à laquelle rien ne peut resister qui n'en soit surmonté. On ne tire ainsi auec force que ce qui ne vient pas de soy mesme, ou est retenu d'ailleurs par vne puissance contraire qu'il faut vaincre. Icy donc le Seigneur a égard à deux

de S. Iean chap. 12. y. 31. 83 choses, premierement à la puissance du piable qui retient tant qu'il peut les hommes dessous sa domination, & ne les laisse aller que malgré luy; & puis à la peruersité de nostre naturel, qui ne s'assujetit point à la volonté de Dieu, & ne le peut en effect. Apres auoir rompu la puissance du Diable à nostre égard & luy auoir ofté ses armes esquelles il se confioit, il faut vaincre la rebellion de nostre chair. C'est donc de la main de ces deux puissans ennemis que le Seigneur nous tire pour nous auoir à soy. Mais le Seigneur le fait en diuerses manieres. Il nous tire d'entre les mains de Satan, non en changeant sa malice, & le faisant consentir à ce qu'il ne vouloit pas auparauant: mais en rendant sa malice inutile, & tous ses efforts sans effect. Mais le Seigneur nous tire d'entre les mains de nostre chair rebelle, en changeant les tenebres de nostre cœur en lumiere, l'affection de la chair en l'affection de l'esprit, & l'amour de ce monde en

Sermon III. sur ces Paroles l'amour de Dieu. Voila pourquoy Satan n'éprouue iamais cette puisfance du Seigneur qui tire les hommes de dessous son empire, qu'auec rage & desespoir qui le tourmente, comme vous le remarqués en cet esprit immonde, qui auec vne legion d'esprits malins comme luy, possedoit le domoniaque des Gadareniens, le Seigneur luy commandant de vuider de cet homme auec sa suitte, il s'escrie qui a t'il entre moy & toy Iesus Fils du souuerain: Ie t'adiure de par Dieu que tu ne me tourmente point. Mais ceux la d'entre les hommes qui sentent en eux cette puissance du Seigneur qui les tire à soy, en surmontant la peruersité de leur cœur, l'esprouuent auec ioye, auec confolation, auec louange & benediction qu'ils en rendent à Dieu; pource que comme cette diuine puissance leur fait connoistre ce qu'ils ne conoissoient point, aussi leur fait elle vouloir ce qu'ils ne vouloiet point: & come ce qu'ils connoissent par le moyen de cette

de S. Iean chap. 12. y.32. 85 diuine puissance leur fait auoir horreur de leur aueuglement precedent: aussi ce qu'ils veulent par la mesme puissance, ce qu'ils aiment, ce qu'ils embrassent, en se rangeant à Christ, leur fait auoir en detestation leurs conuoitises precedentes, auec toutes leurs œuures. Par ce moyen sont tirez les homes à Christ auec vne violence qui leur est douce, qui ne destruit point leur nature, mais la perfectionne, qui laissant à l'homme la liberté essentielle à ses actions (qui consiste à faire les choses qu'on veut faire, & à les vouloir pource qu'on les estime bonnes) ne fait que l'adresser par la lumiere qu'elle luy apporte, & la determiner selon cette lumiere aux choses qui nous sont veritablement salutaires. Ceux qui estiment que la determination de nos volontés à l'obeyssance de Dieu, par l'essicace de sa puissance qui s'en saisit, est la destruction de la liberté humaine, n'ont iamais connu que cette liberté consiste en des mouuemens conduits par la raison, qui ne peuuent estre plus iustes que là où la raison qui en est la maistresse est illuminée de Dieu. Et ce n'est pas merueille si attribuans à la volonté vne liberté qu'elle n'a pas & qui repugne à sa nature, ils ne peuuent trouuer le moyen d'adiuster l'essicace inuincible de la grace auec la liberté des actions de nostre ame. Remarquez icy, que le Seigneur s'attribuë la puissance de tirer les hommes à soy, qu'ailleurs il donne à Dieu son Pere, en disant, nul ne peut venir à moy si le Pere qui m'a enuoyé ne le tire; asin

lean 6. Pere qui m'a enuoyé ne le tire; afin que vous reconnoissés qu'il n'est qu'vn auec le Pere, en puissance comme en volonté, ce qui ne seroit pas pourtant s'il n'estoit vn seul & mesme Dieu auec luy benit eternel-

lement.

Bref, est à remarquer que le Seigneur parlat de la puissance qui attire les hommes à luy ne la restraint pas à quelques vns, mais l'estend à tous, le tireray dit-il tous hommes à moy; ce qui ne peut auoir sa verité

de S. Iean chap. 12. y. 32. 87 au regard de la conuersion du cœur, de la foy & de la repentance; qui sont des graces qui ne sont pas données à tous. Cela nous obligeroit à prendre ce mot tous improprement pour plusieurs, ou pour tous peuples sans aucune difference du Iuif & du Grec, s'il ne s'agissoit que de cette attraction des hommes qui donne la foy; mais le Seigneur batiffant icy son empire sur la destruction de celuy de Satan, parle d'vne attraction des hommes à la reconnoissance de son empire, & de sa domination iuste. Or bien que tous ne viennent pas à reconnoistre la domination du Seigneur Iesus auec foy & repentance: Il faut pourtant que tous le reconnoissent vn iour, Car il faut que tout genouil se ploye Phil. 2. deuant le Christ, & que toute langue confesse qu'il est le Seigneur à la gloire de Dieu le Pere. Il faut que tous com- 2. Cor. paroissent deuant le Siege iudicial de s-Christ, pour remporter en son corps selon qu'il aura fait bien ou mal. Ainsi ceux qui n'auront point esté attirés

par les cordeaux d'humanité, le feront par les chaines de la vengeance, ceux que les compassions de Dieu n'auront point amenés à Chrst auec foy & repentance, luy seront amenez comme gens condamnez au supplice par la seuerité de son iuste jugement.

TROISIESME POINT.

Cette attraction de tous les hommes à Christ qui est la destruction totale de l'empire du Diable, n'a peu auoir lieu cependant que le Seigneur conversoit en chair dessus la terre: estant en cet estat tel que l'auoit representé Esaye au 53. de ses reuelations, fans forme & fans beauté, sans chose aucune qui le rendist desirable, le méprifé & le rejetté des hommes. Voila pourquoy le Seigneur fait dependre la gloire de son empire de son éleuement de la terre: Si, ditil, de la terre ie suis éleué en haut, ic tireray tous hommes a moy, ce qu'il nous faut cosiderer pour nostre dernier point. A proprement parler le Seigneur a esté éleué de la

de S. Iean chap. 12. v. 31. terre en haut, quand depuis sa resurrection il fut éleué au Ciel, soûtenu d'vne nuée à la veuë de ses Disciples. A quoy regardoit S. Pierre quand il disoit aux luifs , Le Dieu de Act. 5. nos Peres a resuscité Iesus que vous aués mis à mort en le pendant au bois, c'est celuy que Dieu a éleué par sa dextre, pour estre Prince & Sauneur, pour donner repentance a Israël & remission des pechez. Et il est tres certain que le Nom du Seigneur Iesus, n'a point esté plus celebré au monde que depuis son exaltation és lieux celestes; depuis ce temps là l'Euangile a esté presché à toute creature, le sainct Esprit a esté enuoyé du Ciel, toute la terre a esté illuminée de sa gloire. Ainsi sans difficulté aucune les paroles de nostre texte se pourront rapporter à l'Ascension du Seigneur au Ciel: si nostre Apostre ne nous eust aduerty qu'en ces mots, si iesuis enleué de la terre, le Seigneur signifioit de quelle mort il deuoit mourir.

Le propre de la mort est de nous oster de la terre où nous viuons, &

90 Sermon III. sur ces Paroles quand en mourant nous passons de ce monde icy au Pere, on peut dire auec verité, que de la terre nous fommes éleués au Ciel, qui est le lieu où Dieu recueille ses enfans. Mais nostre Apostre ne dit pas simplement que le Seigneur parloit de sa mort, mais qu'il signissoit de quelle mort il deuoit mourir, à sçauoir de la mort de la croix, où il deuoit estre attaché par les mains des iniques, comme au mesme sens il disoit ailleurs aux Iuifs, Quand vous aurez éleué le Fils de l'homme, alors connoistrezvous que ce suis je, & que ie ne fay rien de par moy mesme. Chacun sçait que la croix estoit vn genre de supplice où les criminels estoient cloués, estendus par les mains & par les pieds, & ainsi attachés estoient haut éleués en l'air fur le bois où ils estoient pendus, afin d'adjouster à la douleur de cesupplice la honte d'y estre exposé en veuë à vn chacun. A cause de cela ce genre de mort auoit esté maudit de Dieu expressement. Cet

Ican 8.

de S. Iean chap. 12. ¥. 32. 91 Eternel ne pouuant voir l'homme qui porte son image exposé à cause du peché à la honte de toute creature, qu'auec execration. Le Seigneur Iesus donc sçachant qu'il deuoit mourir crucifié, à peu en parlant de sa mort, dire qu'il seroit éleué de la terre en haut, & là exposé à la veuë des hommes. Mais s'il n'y auoit que cela le Seigneur n'auroit pas dit, le tireray tous hommes à moy, tant pource qu'il ne pouuoit pas là estre veu de tous les hommes, que pource qu'vne telle veuë fait plus d'horreur qu'elle n'est attirante.

Icy donc le Seigneur a égard à deux choses, I. à la qualité de sa mort qui est vnique en son espece, comme on parle. Si vous ne regardés que l'exterieur du supplice, plusieurs ont esté crucissés, & deux le furent auec le Seigneur: mais si vous considerés en nostre Seigneur la personne qui a sousser la croix, le sujet de ses soussers, & la consideration que Dieu en sait, alors

92 Sermon III. sur ces Paroles cette croix qui en toute autre n'a rien que de honteux & d'execrable. a toutes choses diuines, & digne d'vne souueraine recommandation entre les hommes. Cé crucifié est le Fils vnique de Dieu, le sujet de sa croix sont les pechez des hommes, & l'expiation que luy seul en a peu faire par son sang : Luy inste est mort pour nous iniustes afin qu'il nous amenast à Dieu, il a esté éleué en cette croix deuant Dieu come on éleuoit iadis les sacrifices qu'on luy presentoit, afin aussi d'estre vn sacrifice tout diuin, qui appaisoit son ire. La consideration que Dieu en fait est telle, qu'à cause d'else Dieu l'a sou-Eph. 2. uerainement exalté & luy a donné vn Nom par dessus tout Nom, &c. En cette croix il a esté mis au dessus de tous les hommes de la terre, comme le seul sainct innocent, separé des pecheurs, qui a peu mourir pour eux. En cette croix il a esté offert à Dieu comme la seule victime qui luy pouuoit estre agreable : bref en

certe croix il trouue le fondement

de S. Iean chap. 12. \$\vec{y}\$.32. 93 de la gloire qui l'éleue au dessus de toute creature. Tellement que si le bois où il a esté atraché l'a éleué haut en l'air aux yeux des hommes, les raisons sur lesquelles sa mort est appuyée, & toutes les merueilles qui s'y rencontrent éleuent sa croix mesmes iusques par dessus tous les cieux, où ce crucissé auec son sang

a esté receu en gloire.

L'autre chose, à laquelle le Seigneur a icy égard est la predication de son Euangile, qui par tout porte ce crucifié ainsi exalté en gloire à cause de ses souffrances, & le propose à contempler à tout homme, pour estre à qui en a besoin source de vie & de benediction; à cause de cela la predication de l'Euangile est appelée la parole de la croix, pource qu'elle ne sert qu'à porter la croix de Christ par tout le monde, & en expliquer les mysteres à tous. Ainsi on peut tres - bien accomparer la predication de l'Euangile, qui expose à la veuë de tout le monde ce crucisié mort pour nos offences, & 94 Sermon III. sur ces Paroles resuscité pour nostre iustification, à cette perche sur laquelle Moyse éleua le Serpent d'airain au desert, pource que par la predication de l'Euangile, la croix du Seigneur est mise en euidence à tous, asin que quiconque croit en luy ne perisse point, mais ait la vie eternelle, & ne faut point douter que le Seigneur Ielus en disant si ie suis éleué de la terre ie tireray tous hommes à moy, n'ait regardé à l'éleuation du Serpent au desert, ayant pour les ames dans l'éleuation de facroix par la predication de l'Euangile, le mesme vsage qu'auoit iadis l'éleuation du serpent d'airain pour les corps. C'est donc le moment où ce crucifié attire à soy les hommes, leur presentant en sa croix la charité de Dieu, la paix de Dieu, l'esperance de la vie eternelle, qui sont choses capables de faire vne viue impression és cœurs des hommes qui se sentent morts & perdus en leurs pechés, c'est le moment encore où sa croix triomphe de la puissance du

de S. Iean chap. 12. ¥ 32. Diable & de la rebellion des hommes, la predication qui la porte par tout, estant accompagnée de la vertu du tres - haut & de l'esprit qui conuertit les cœurs. En fin c'est le moment où il faut que Satan quitte la place au Fils de Dieu, dechée de toute puissance au monde, & subisse auec ses sectateurs le iugement eternel du plus fort qui l'a vaincu par son sang, la destruit par son Esprit, & la dépoüillé de toutes ses armes par sa puissance infinie. Si le Seigneur n'eust point esté crucifié, sa croix n'auroit point esté portée par tout le monde, n'y estant point portée, elle n'auroit point triomphé de la puissance de tenebres. Il falloit donc que le Christ fur éleué de la terre, qu'il mourût, & que sa mort fust preschée à toute creature, afin de planter son regne dans l'empire mesme du Diable, destruire cet ennemy des hommes & restablir toutes choses.

APPLICATION. C'est là, Tres-chers Freres, l'ex96 Sermon III. sur ces Paroles position des paroles de nostre Seigneur lesus, pour les nous appliquer: Representez-vous en premier lieu, combien l'empire du Diable est puissant en ce monde, puis que pour le destruire il a fallu que le Fils de Dieu fut employé. Destruire celuy qui auoit dessus nous l'empire de mort, est nous ouurir le chemin de la vie; admirés donc icy fideles la charité de Dieu, qui pour vous deliurer de la puissance du Diable a voulu employer iusques à son propre Fils. Et puis que ce Fils n'est apparu que pour destruire les œuures du Diable, puis qu'il ne peut iamais y auoir d'accord entre le Prince de vie & le Prince de tenebres; sçachés qu'il faut renoncer à l'vn pour se tenir à l'autre. Si vous aimés le Seigneur Iesus, vous hairés son aduersaire: si vous prennés plaisir en la verité du Fils de Dieu, vous detesterés les mensonges du seducteur des hommes; si la saincteté du Sauueur vous plaist, vous aurez en horreur les œuures de la chair qui y repugnent

de S. Iean chap. 12. v. 32. 97 repugnent. Mais si ce monde vous tient au cœur, si ses vanités vous delectent, si vous vsés de ses coustumes, vous estes encore esclaues du Prince de ce monde, & n'auez point encore esté transportez de la puissance de tenebres au Royaume du Fils bien aimé de Dieu.

Representez vous en second lieu, combien il faut que la malice de l'esprit humain soit grande, puis qu'à moins que le Seigneur nous tire nous ne pouuons venir à luy. Cette impuissance nous excuseroit si elle venoit d'ailleurs que de nostre volonté, qui est si esclaue du monde qu'elle ne peut auoir de mouuement au contraire de ses conuoitises. Cette volonté mesme qui est la maistresse de nostre vie seroit à plaindre plus qu'à blasmer, si dans l'independance de toute puissance superieure que ceux de Rome luy attribuent, elle se trouuoit, par vn pur hazard, entre les mains de l'ennemy. Mais la volonté n'ayant de mouuement que ce que la raison

G

98 Sermon III. fur ces Paroles luy en donne, il faut que la raison la trompe quand elle se fouruoye, & que son impuissance à vouloir le bien, procede d'vn aueuglement horrible de nostre esprit, qui est insensible à la verité, y resiste auec des preiugés charnels, & blapheme à lencontre quand il en est couaincus Que si on ne peut resister à la verité sans crime, pource que cela vient d'vne peruersité de nostre esprit, dont Dieu n'est pas autheur; estre inflexible en cette resistance, n'estce pas estre meschant au dernier point, & en cela mesme du tout inexcusable. Cosiderons donc d'vn costé la puissance du Seigneur, & de l'autre sa grace; sa puissance à conuertir nos cœurs, & les détacher du mal qui les possede, pour les appliquer au bien qui leur est conuenable, ce que l'Escriture accompare à vne resurrection; sa grace en ce qu'il daigne déployer cette excellente grandeur de sa force sur des sujets si coupables. Confessez vostre impuissance, exaltez sa force, de S. Iean chap. 12. V. 31. 99 fiés vous en sa grace, & auec l'Eglise au premier des Cantiques, demandés luy qu'il vous tire, & auec l'Apostre qu'il vous donne les yeux de vos entendemens illuminés, & vous face comprendre l'esperance de la vocation de Dieu, & la gloire de son heritage és Saincts, & cela auec tant d'essicace qu'en contemplant cette gloire du Seigneur à face descouuerte, vous soyez transformés dans vne mesme image de gloire en gloi-

re par l'Esprit du Seigneur. 5.

Considerés en troisiéme lieu, que l'instrument de cette divine force qui tire les hommes à Christ, est la croix de ce Sauueur, qui a, auec vne abondance infinie, tout ce qui se peut souhaitter de grace & de salut pour les hommes, si d'autres considerations que celle de la croix vous tire à Christ; tenés pour certain que l'Esprit qui en cela vous pousse, & vous meut, n'est point l'esprit de Christ, mais ou l'esprit de ce monde, qui n'espargne pas mesmes les choses les plus sainctes pour les faire sersa.

100 Sermon III. sur ces Paroles uir à ses desseins charnels, ou l'esprit de seruitude, qui ameine par la seule crainte de l'ire, ceux que l'amour de la verité ne peut émouuoir. Voulés vous donc, tres-chers Freres, que la vertu de l'esprit du Seigneur abonde en vous, & non seulement vous tire à luy, mais vous affermisse pour iamais en sa communion; mettés sa croix dedans vos cœurs, medités continuellement ses merueilles, contemplés y les profondeurs de la sapience diuine, les loix irreuocables de sa iustice eternelle, les richesses incomprehensibles de sa misericorde, le prix inestimable de ce sang épandu, le grand salut qui vous en reuient; c'est auec vn si diuin object que la vertu de Dieu se déploye pour en faire entrer la lumiere en nos ames, en recréer nos esprits, en sanctifier nos cœurs. En cette maniere nous sommes crucifiés auec Christ, & ne viuons plus nous; c'est Christ qui vit en nous; & ce que nous viuons en la chair nous le viuons en la foy du Fils de

de S. Iean chap. 12 y. 32. 101 Dieu qui nous 2 aimés & s'est donné

soy mesme pour nous.

En fin representez-vous que cette croix, seul instrument de la vertu de Dieu en nous, est éleuée au milieu de nous par la predication de l'Euangile, qui la nous presente, en expose les secrets, en propose l'esperance à tout homme. Ce Christ crucifié, ainsi éleué en haut aux yeux de tout le monde, est scandale aux Iuifs & folie aux Grecs; mais à nous qui sommes appelés, c'est la puissance de Dieu & la sapience de Dieu. Que les hommes esseuent tant qu'ils voudront, l'effigie d'vn crucifié sur des croix de bois d'or, ou d'argent; qu'ils les portent dans leur sein, à leur ceinture, dans leurs mains, deuant leurs yeux, tout cela sans la parole de l'Euangile sera inutile pour la sanctification des cœurs, servira plustost à la superstition qu'à l'instruction. Il ne faut pas penser que Dieu accompagne de son Esprit vne invention humaine; establie sans sa parole & contre sa

102 Sermon III. sur ces Paroles parole, & afin d'obliger les hommes à s'en passer, l'Euangile est la seule puissance de Dieu en salut à tout croyant, le seul ministere de l'esprit, le seul chandelier de l'Eglise, où resplendit la grace de Dieu salutaireà tous hommes. C'est le tresor que vous possedés, ne le meprisés point de peur qu'il ne vous soit osté, contemplés y le Fils de Dieu mort pour vos offences & resuscité pour vostre iustification, & cette celeste parole vous attirera à luy, vous fera trouuer en luy vn salut accomply, la remission parfaite de vos pechés, la sanctification de l'ame & la vie eternelle. A luy comme au Pere & au sain& Esprit soit tout honneur & gloire force & puissance eternellement. Amen.



